




Il
Strolic

pal

1987

Filologjche



1987

1987

1987

Autorizzazione del Tribunale di Udine del 22.5.1982 n. 12/82. Supplemento al n. 2-1986 del bollettino «Sot la nape». Spedizione in abbonamento postale - gruppo IV/70.

An LXVIII

Il

STROLIC FURLAN

pal

1987

1986

Societât Filologjche Furlane

UDIN

*Lis figuris dai Sanz ch'a comparissin a cjâf di ogni
mês, li àn buridis fûr Elvia e Renato Appi, dal Archivi
di Stât di Udin là che si cjâtîlis sot la vôs «Congrega-
zioni Religiose soppresse» e l'ultime (mês di Dicembar)
p.g.c. del Collegio Notarile di Udine July Brunaleschi
opus 1758. Riproduzions fotografichis di Riccardo Viola.*

1987

de vignude di Crist

IL 1987 AL RISPUINT:

- al 6700 dal Circul Julian;
- al 2740 de fondazion di Rome;
- al 5746 dai Ebreos;
- al 1365 dai Maometans;
- al 2168 de fondazion di Aquilèe.

FIESTIS VARIABILIS:

- la Cinise (4 di marz);
- Pasche (19 avrîl);
- la Sense (31 di maj);
- Pentecostis (7 di jugn);
- Santissime Trinitât (14 di jugn);
- Corpus Domini (21 di jugn).

FIESTIS DI PRECET:

- dutis lis domèniis;
- il prin dal an;
- la Pefanie;
- la Madone d'avost (15 d'avost);
- Fieste dai Sanz (1 di novembar);
- la Madone di dicembar (8 di dicembar);
- Nadâl (25 di dicembar);
- San Scjêfin (26 di dicembar).

FIESTIS NAZIONÂLS:

- Liberazion (25 d'avrîl);
- Fieste dal Lavôr (1 di maj);
- Fieste de Republiche (2 di jugn).

1987

Lis notis sui Sanz e sui Beâz che si cjàtin tal
«Strolic» a' son stadis butadis jù di Meni, gjava-
dis fûr dai libris «Il Friuli, uomini e tempi» di pre
Bepo Marchet (ed «Camera di Commercio, Indu-
stria e Agricoltura», Udine, 1959) e «Mille Santi
del giorno» di Piero Bargellini (ed. Vallecchi -
Massimo, 1983).

I tesc' sui vins Picolit, Merlot e Verduz di Ramàn-
dul a' végnin fûr dal librut intitulât «I vini del mio
Friuli» di Adelaide Mesaglio.

PREÂMBUL

Al capite te vite qualchi câs che, propit biel che duc' fâs fieste, a qualchidun j tocje di lavorâ di plui e di no rivâ a fâ dut.

A Lelo Cjanton j è capitât chest tal '86, ma al à resolvût il problem cul ridusi il program dal so contri-bût al «Strolic», ch'al jere di dodis pinsîrs par ogni mês dal an e di altris dodis pinsîrs par dodis paîs furlans.

Salacôr vincjequatri pinsîrs a' saressin stâz masse in tun an, co al bastarès dome che un pinsîr biel ch'al duràs dute la vite.

Ma quâl pinsîr? Difizzil intivâlu. Lui, Lelo, cheste volte, al à provât cun dodis: sis pai prins mês dal an e sîs par sîs paîs. Altris pinsîrs al podarà vêju un'alte volte e, se nol intivarà mai nuje, nancje cun vincjequa-tri o plui, i letôrs a' varan almancul la pussibilitât di viodi cemût che un omp al sa piardi timp.

IL STROLIC

PREAMBLE

Whereas the people of the United States, in order to form a more perfect Union, establish Justice, insure domestic Tranquility, provide for the common defence, promote the general Welfare, and secure the Blessings of Liberty to themselves and their Posterity, do hereby ordain and establish this Constitution for the United States of America.

We the People of the United States, in Order to form a more perfect Union, establish Justice, insure domestic Tranquility, provide for the common defence, promote the general Welfare, and secure the Blessings of Liberty to ourselves and our Posterity, do hereby ordain and establish this Constitution for the United States of America.

That the said People of the United States, in Order to form a more perfect Union, establish Justice, insure domestic Tranquility, provide for the common defence, promote the general Welfare, and secure the Blessings of Liberty to ourselves and our Posterity, do hereby ordain and establish this Constitution for the United States of America.

That the said People of the United States, in Order to form a more perfect Union, establish Justice, insure domestic Tranquility, provide for the common defence, promote the general Welfare, and secure the Blessings of Liberty to ourselves and our Posterity, do hereby ordain and establish this Constitution for the United States of America.

That the said People of the United States, in Order to form a more perfect Union, establish Justice, insure domestic Tranquility, provide for the common defence, promote the general Welfare, and secure the Blessings of Liberty to ourselves and our Posterity, do hereby ordain and establish this Constitution for the United States of America.


1778

CATASTICO DE BENI DI
RAGIONE DELLA VNE:
SC.^{la} DI S. ANT. AB. DI
CORDENONS



CARLO COL PÈERAG. DI DETTA
VNE. SCOLA

Zenâr



S. Antoni abât, 1778

Catastico de Beni di ragione della veneranda Scola di
S. Antoni abât di Cordenons.

I

- 1 J PRIN DAL AN
2 V S. Basili
3 S S. Gjenoeffe
4 D S. ERMIS



- 5 L S. Melie
6 M PEFANIE
7 M S. Luzian
8 J S. Severin
9 V S. Julian



- 10 S S. Aldo
11 D BATISIN DAL SIGNÔR

- 12 L S. Modest
13 M S. Veroniche
14 M S. Feliz
15 J B. Durî di Pordenon
16 V S. Marcel
17 S S. Antoni abât
18 D S. FAUSTINE



- 19 L S. Mario
20 M S. Bastian
21 M S. Gnês
22 J S. Vizenz
23 V S. Raimont
24 S S. Franzesc di Sales
25 D CONVERSION DI S. PAULI



- 26 L S. Paule
27 M S. Ânzule Merici
28 M S. Tomâs di Aquin
29 J S. Costant
30 V S. Martine
31 S S. Zuan Bosco



Ženâr. Il prin dal an si scolte Viene
ch'a sùnin chêi biêi vâlzars di une dî,
che il sanc lu fâsin boli in ogni vene
a chêi che i agn ur pêsìn come a mì.

Po' 'e ven la Pefanie cui fûcs in vøre
e il fum a lâ secont ch'al tire il vint;
e nô chel fum a strolegâj parsôre;
e po' fâ fieste ai premis di Tarcint.

M.

UNVIÂR DE CUELINE

*Di unviâr ce biel il colôr
zalit cjalt de cleve!,
e quanch'al nevèe
ce ésal di miôr de cueline
cun dutis lis bachetis des cisis
ch'a 'zùin di recamâ?,
cun duc' i trois e lis stradelis
ch'e àn lis stelis dai flocs
a pojâsi alì lizeris,
lizeris tanche pavèis, lizeris...?,
cun duc' i cops des cjasis
che se tu tasis tu ju sinz cjantâ?
E i fogolârs des ostariis, amîs?
Amîs, chêi fogolârs là,
tra i cjamps ancjemò cui morârs
duc' neris, te criure,
chêi fogolârs a' son ancjemò
là,
cul plui biel cjalt dal unviâr!*

L. C.

ZENÂR

Al è tant timponòn che il rituâl di Prindalàn al è chel di jevâsi stracs e dibòt malâz, dut parceche il rituâl dal Ultindalàn al è chel di no lâ a durmî, di stracâsi e di strajemplâsi.

Nol vâl, alore, chel mût di dî ch'o vin vût imparât a scuele: «Anno nuovo, vita nuova». Al incontrari, anzit, si pò dî che ogni an gnûf nus puarte vite viere, no dome parvie des strachis che si cjape tra une buine fin e un brut prinzipi, ma ancje parceche di agnoruns 'e je ogni volte simpri chê, e ogni an si devente plui viêi di un an.

Ce ch'al covente tune tâl situazion al è di vê: 1) i Untinsdalàn simpri unevoronone di sium e mai une palanche in sachete; 2) i Prinsdalàn une voe grandonone di lavoronâ, fasint simpri alc di gnûf, e deventant ogni an plui 'zovins di un an, fintremai che si sint di tornâ a nassi.

Alore, la prime robe di fâ par rivâ un tant 'e je di spindi sparagns e tredicesimis in mût di restâ senze bêz bielzà a San Stiefin, e la dî dal Ultindalàn lâ a durmî, stracons di lavôr, 'es nûf di sere.

Tal indoman abuinore si sintarà a cjantâ i ucêi, e 'e sarà dute une fieste.

L. C.

UNVIÂR

a Pauli Zanussi

*Quant finaràial, Pauli, chest unviâr
che no mi dà un minût di remission?
Tant ben che jo 'o starès in tal pajon
la plùzzare sul stomi a fâmi acjâr!*

*Ma 'o scuèn jevâ secont che 'e Crôs j pâr
che, jê, no j va di stâ cun tun poltron;
e alore lis mês oris in senton
cjazzât dongje di un fûc di rôl e uâr.*

*Ma là che stomi e panze m'ai sboénti
devant di chel borez, la puare schene,
cun dut tapât ch'o sedi, un frêt che mai!*

*E séi bessôl. E nie che mi contenti.
E il timp eterno a cressi la mê pene!*

Ven a cjatâmi, Pauli, se no guai!

MENI

BEÂT DURÌ DI PORDENON

Al à nassût 'tôr dal 1270 tune famée Mattiussi di Vilegnove di Pordenon, e al è stât ordenât frari franzescan a Udin tal 1295.

Dopo di vê predicjât atôr pal Friûl e ca e là in Ongjarie e in Polonie, al parti pal Orient par un'òpare di vangelizazion tai paîs adulà ch'a vevin za stât i fraris Giovanni di Pian del Carpine e Guglielmo di Fiandre, daûr dal marcjedant venezian Marco Polo, chel che nus à lassât scrit «Il milione».

Si imbarcjà a Vignesie tal 1318. Al rivà a Trebisonda, sul mâr Neri, e di lì, a pît, al traviarsà la Armenie e la Persie. Podopo, par mâr, al rivà in Indie. Al tocjà la zitât di Bombay, la isule di Ceylon, la isule di Giava, il Borneo e la Malesie, simpri cun miez di furtune e obleât a lungjs sòstis ca e là. Squasi vot agn di viaz de-nant di rivà a Pechino là ch'al veve dezzidût di lâ e di fermâsi.

A Pechino a' jerin za stâz fondâz doi convenz di franzescans, che ur abadave il frari Giovanni da Montecorvino, Arzivescul e Patriarceje. Durì si metè a sô disposizion e al tacà a vøre cun straordinarie passion, e in tre agn a rivà a batiâ passe vinc' mil chinês.

Dopo tre agn, l'Arzivescul al dezzidè di mandâlu dal pape Zuan XXII, che in chel timp al regnave, par individâlu a mandâ altris fraris in Chine, e al parti, a pît, par vie di tiare.

Al traviarsà il Tibet, e podopo la Persie e l'Armenie di gnûf, talpinant par mijârs e mijârs di chilometri, e tal 1330 al rivà a Vignesie. Al oleve, lui, lâ subite dal pape, ma nol jere masse in salût, di mût ch'al scugnì fermâsi a Padue, adulà ch'al detà une relazion sui siêi viaz.

Al murì a Udin il 14 di zenâr dal 1331 tal convent di San Francesc. Tal 1755 il pape Benedet XIV lu proclamà beât.

Il so cuarp uê al polse tune bieles arcje di piere a Udin, te glesie dal Carmini.

COGNONS

Gno pari al jere un biel rizzot, voglons celesc', moschetis ae Clark Gable, simpri elegant. Une robe sole no la veve gran biele: il non di famèe: si clamave infati Scrosoppi.

Une sere, quant che ancjemò al morosave cun mê mari, co al dezidè ch'e jere ore di tornâ a cjase, mê none lu visà ch'al veve tacât a plovi; j disè: «Jo, Carlo, 'o puès imprestâti nome chel scrosopat di ombrene ch'o ài là tal cjanton...».

PAULE SCJECÂT

Il fat di dâ il to consêi quant che nol è domandât, nol è altri che un mostrâsi plui savi di chel che tu j dâs il consêi, anzit, al è squasit un ridilu dal so pôc savê e de sô ignoranze.

GIOVANNI DELLA CASA

DIARI

*E alore Rai Triest 'e à scomenzât
a fâ publicitât
a chêi che in Furlanie
a' van sbrocansi a scrivi in puisie.*

*'E à scomenzât a fâlu (e 'e jere ore)
uê 'tôr la une. 'E à dit: «Cui ch'al lavore
a pro di duc' al merte in ogni mût
di séi valorizât, di séi savût,
di séi sintût di duc', di tanc' ch'o sin».*

'E à scomenzât dal prin.

M.

8 di zenâr dal '86

Biliroz

A' vevin finît di tirâ sù lis lôr cjasis cu lis lôr mans grupolôsis e cu lis palanchis sudadis vie pes Gjarmàniis. A' vevin lavorât an dopo an in chêi doi o tre mês ch'a podevin stâ in paîs parvie dal frêt, e in chel an Gjgj Pole e Noni Scjecât a' vevin dezzidût di meti sù famêe.

A' varessin cjoltis dôs sûrs, dôs Ucelis: Gjgj la Faustine e Noni la Dele: Gjgj la Faustine, la «dilicadine», parvie che di frute 'e veve vût rot un comodon mateant (infati, 'e varès vivût nome noventedoi agn!), e Noni la Dele, un sclopon, plene di sentiment.

Sul treno, tornant de Gjarmànie, a' vevin pensât, di amîs tant ch'a jerin di quant ch'a jerin nassûz, ch'al sarès stât di just maridâsi insieme te lôr glesie ch'e jere chê di Biliris, senza lâ, come ch'a vevin simpri scugnût fâ fin alî i biliroz, fintrimai a Dartigne.

Rivâz a cjase no pandèrin nie a dinissun, e tal indoman, smondeâz e mudâz, a' larin a Dartigne a fevelâ cul plevan.

Ma il plevan nol fo nie content di lôr quant ch'al sintì ch'a vevin la idêe di maridâsi a Biliris. «Ma savêso fantaz che la glesie... la tradizion... lis usanzis...».

«Nô 'o sin di Biliris, e a Biliris 'o vin fate la cjase, e a Biliris 'o vin di lâ a stâ...».

«Ma no savêso che i uestris nonos e i uestris paris...».

«Poben, siôr plevan», a' rispuindèrin i doi, «se no us pâc cussì, alore nô lis menìn a cjase come ch'a son».

Il 23 di zenâr dal 1907 lis cjampanis di Biliris e' àn sunât a fieste pe prime volte par un matrimoni, e il 23 di zenâr dal 1957 e' àn tornât a sunâ, par visâ la int di Biliris, di Daprât, di Magnan, di Colarumiz e Buèriis che Gjgj e la Faustine, e Noni e la Dele a' jerin an-cjemò i prins a lâ a Messe te lôr glesie pes lôr gnozzis d'aur.

P. S.

*Dulà ch'e je une frute inamorade
nol zove che la puarte 'e sêi siarade.*

PICOLIT

Al è il plui bon vin che si fâs in Friûl, preseât e laudât di agnorums in ca e di personis in grant.

Si lu fâs cu la uve dal risit dal stès non, che la sô scjarse produtivitât lu varès distinât a scomparî se nol fôs stât curât a dovê.

Scune ideâl, e uniche zone a «denominazione di origine controllata» pe colture di chest risit 'e je chê dai cuêi a soreli jevât dal Friûl.

Al è un vin che si preste a jéssi invecjât e che anzi al domande di séilu par rivâ al miôr. Tes butîliis al pò stagjonâsi par agn, pûr ch'al cjati une cantine come cu va.

Al à un biel colôr d'aur e un bonodôr delicât di rôsis e di pomis maduris, e pal savôr ch'al à, inconfondibil, fêr e aristocrâtic, come vin di bévilu adasi adasi, a fladuz, no 'nd' è un altri compagn.

Al à sui qutuardis grâz di àlcul, e al va gjoldût fresc, sui dodis grâz.

No si sa di un precîs quant e in ce sît ch'al è comparit ca di nô. Al è stât dit che si vèvilu te prime metât dal sietcent, ma i prins siêi vignâi di une buine impuortanze a' son stâz implantâz e curâz te seconde metât di chel sècul dal cont Fabio Asquini a Feagne. A chest siôr j va il mèrit di vêlu fat cognossi in Russie, in Austrie,

in Baviere, che lu tetavin i zârs, i Asburgos e i nòbii e i papis: che nome chesc' a' podevin gjóldilu pe sô rare-tât, pal presi ch'al vignive a vê a reson de avarizie dai siêi risiz in fat di produzion e dal lavôr ch'a domandavin la vendeme de sô uve (si j tirave jù àsin par àsin dai raps) e la lungje stagjonadure.

Localitâz tìpichis di produzion a' son: Seorgnan, Tojan, Cividât, Spesse, Buri, Rocje Bernarde, Cuâr di Rosazzis.

Se no vèssin difiez, no varèssin tan' gust di notâ i difiez di chêi altris.

FRANÇOIS DE LA ROCHEFOUCAULD



SANTA LIBERAV.
SCOLA NELLA CHIESA
DI DETTA SANTA IN RONCHIS
m. 1756 m.

Feyrâr



S. Libare, 1756

V. Scola nella chiesa di detta Santa in Ronchis.

II



1 D S. BRIGJDE

2 L *Presentazion al templi*

3 M S. Blàs

4 M S. Gijlbert

5 J S. Àghite

6 V S. Dorotèe

7 S S. Romualt



8 D S. JOVENZI DI AQUILÈE

9 L S. Pòlonie

10 M S. Scuelastiche

11 M *Madone di Lourdes*

12 J S. Lalie

13 V S. Selmo di Cividât

14 S S. Valantin



15 D S. SEVÈR

16 L S. Juliane

17 M SS. Donât di Concuàrdie

18 M S. Flavian

19 J S. Mansuet

20 V S. Cirl

21 S S. Nore



22 D S. MARGARITE DI CORTONE

23 L S. Marte

24 M S. Sergjo

25 M S. Cesari

26 J S. Sandri

27 V S. Gabriel de Indolorade

28 S S. Rufin

Fevrâr nol è un biel mêś. Tu pûś stufâti
che il frêt difûr al imbramîs la cjâr;
ma in cjase dibessôl tu pûś parâti
denant dal zoc ch'al art sul fogolâr.

Denant de flame ch'e va sù pe nape
tu pûś socâ qualcunchesêi pinsîr,
e tornâ a vivi un jenfri cu la clape,
Rinado, Zenco, Zurche, par intîr.

M.

FEVRÂR

Cumò, di chest mês, no si cjàtin plui lis violutis che une volte si viodèvilis sui rivâi, parceche no si va mai a cirîlis. I rivâi, invezzit, si cjâtiju ogni tant, quanche si va a ribaltâsi cul otomobil, massime dopo di qualchi sagre.

A' disin duc' che a lâ a pît si sta masse, ma nol è dome chel il problem. al è ancje che no tu puedis instesnò viodi lis violutis dai rivâi, che se un al va a pît lu cjàpin sot prime chal rivi a olmânt qualchidune. Ce mont! Cumò un al nas e, apene ch'al à imparât a cjaminâ, il papà j compre la machine. A disenûf vinc' agn, chel al à za disparât a cjaminâ. Co al à la patente, al à di cori, si capîs! Paraltri, s'al lavore, nol varà mico di cjaminâ ancjemò dongje, nomo?

Chel che si à di dî sul mês di Fevrâr al è che, se un al va a finîle ribaltât cu la machine sui rivâi a po nol rive a viodi ch'a son verz, in tun tâl câs si scuén propit ameti, come i vons, che «Fevrarut al è piês di dut».

Il vert al è il colôr de nature, de tiare mari, de vite! Al conven, duncje, di viódilu. Ma cul mont di vuê ch'al è ce ch'al è, par no ribaltâsi, no jéssi cjapâz sot e viodi il vert, l'uniche al è di no nassi omps.

Al è tant biel nassi, invezzit, violis platadis, fresculinis, par viodi dome ce ch'al è biel de vite, come par esempi la lûs.

L. C.

FRUZZONS

Memo Jute di Tresésin al lave a cjatâ la morôse cu la biciclete fin a Colorêt, e une sere, intant ch'al jere a cjatâle, al veve tacât a ploi a segloz e no la finive plui.

Alore la mari de morôse, viodût che no la finive plui, j disè: «Posto che no la finis plui, reste chi a cene cun nô».

Content lui!

La mame 'e parecjà su la taule in cusine la cene ancje par lui, podopo lu clame, ch'al varès vût di séi tal tinel.

Ma nol è tal tinel. Lu clâmin e lu cîrin ca e là e no lu cjàtin. Nol è!

Al è rivât in cjase trequarz d'ore dopo, strafont. J domândin: «E alore? Dulà âtu stât fin cumò?».

«A Tresésin a visâ mê mari ch'o sarès restât a cene chi».

Uarbite

La calandre

Domenie 4 di fevrâr dal '79. 'O vevin stât a mangjâ il pès a Grau, jo, la mê femine, Lelo e Ado, cu la machigne di Ado, e 'o tornavin a cjase 'tôr des tre dopomisdì.

Serens, passûz e contenz come paschis, 'o vevin cjaminât sù e jù adasin sul ôr dal mâr che si moveve juste chel tant, che no tirave une bave di àjar, che il cîl al jere net, ancje se un pôc fuscât; e che int pacjliche, in gjènar anzians e frutins, a' lavin ancje lôr sù e jù come nô; po' 'o vevin gjoldût un caffè e bevût un taj mancu-mâl. E 'o tornavin a cjase.

Su chê machignone di Ado che si stâj dentri come a séi tun sofà, 'o vevin passât Bielledê, dopo di vê tetade la viste di Barbane, devant di rivâ a Bielledê, su la drete: un incjant; e cjalâz i cocâi a mijârs, ce a lâ vie come razzis su l'aghe, ce a butâsi jù come sfûlmins dal cîl ch'a vevin sigûr lampât qualchi pès, ce a jevâ sù da l'aghe come reoplanos, ce a svoletâ cun chês lôr alis largjs adasi, batintlis juste chel tant.

'O lavin vie senze presse pe biele strade, pôc traficade, ch'e tae fûr la planure cun nissune cjase sul ôr, che si viodeve nome, a distânzie, séi a drete che a zampe, qualchi zuf di ârbui spuejâz; quant che Lelo al scomenzà a fevelânus che su la zampe, a di un pont, 'e jere, lontane forsi un chilometro, une gleseute piardude te plane, che lui la veve visitade tornant a Udin in biciclete, timp indaûr, di Grau.

«Stant ch'al è adore e che no vin nissune primure», al disè Ado, «anin alore a viódile cheste gleseute, se Lelo al sa dînus ce strade che si à di cjapâ par rivâle».

Lelo al diseve: «'E je dal sigûr su la zampe. No si viódile di lontan parvie ch'e je taponade di une boschete di pins. Là ch'o vio-

dês une boschete di pins a ombrene vie di chê bande, là 'e je, e une stradele di campagne ch'e jès fûr su l'asfaltade che cumò 'o cjaminin, 'e je chê che nus mene».

'O cjalavin in duc' biel che la machignone di Ado 'e lave vie ben plancut. Po' Lelo, ch'al jere l'aspet: «Ve' le là», al dîs, «la boschete di pins ch'e je la gleseute. E la strade par lâj, ve' le li».

Ado al volte la sô machigne e si met su che stradelute che j veve dit Lelo, l'aspet.

Miez chilometro di strade tra cjamps semenâz di forment tant di ca che di là, senze un ârbul, cun juste qualchi fossâl di scolo; e une cjase coloniche in dentri, lontane, di modon che, si viôt, a' stavin i parons o i fituâi o i mezadros o i colonis di che vastitât di terens. E su la cjaradòrie nome la nestre machigne, e un cidinôr dut atôr, e no un segno di vite.

Po' adasi adasi, che la cjaradòrie 'e jere un pacjuc pes gran' plois ch'a jerin coladis i dîs prin, si rive là che chê strade e finive. Ma la boschete cui pins a ombrene vie 'e jere lontane ancjemò.

Quant che Ado al è obleât a fermâ il so vagon che la strade 'e finive, Lelo al dîs: «'O ài sbaliât. La strade par rivâ là de glesie 'e à di séi plui indenant».

'O tornin indaûr a cjàpâ di gnûf la asfaltade, e uns tresinte metros dopo 'o jentrin sun tun' altre stradele ch'e pontave instès viars la boschete di pins ch'e platave la geseute di Lelo. «'E je cheste», al dîs Lelo.

Pantan anje li su chê cjaradòrie, tra cjamps instès di forment che no finivin pluì. E atôr anje li, nancje un ârbul, un sterp. Nome la grande cjase lajù, di modon, chê di prin, cun pòs balconuz, senze segno di vite.

La cjaradòrie 'e finì tal curtilon di chê cjase senze segno di vite, che si viodevin dapît un pâr di tratôrs e altris machignis pe agriculture.

Ado al scugnì zirucâ, e cun fadie, ch'al jere dut un losoz ancje lì. 'O vîn pensât che nol jere il càs di bazilâ indenant par ciri di rivâ là de gleseute. Ado al à metude la machigne in stangje par jèssi su l'asfaltade e po' vie, simpri plancut. E no fevelavin plui nancje, par Lelo nol restàs mâl, che nol jere stât bon di menânus a viodi chê glesie sot i pins a ombrene vie jù par là.

E a di un pont in chel zito ch'al jere, la femine, sentade su la sente devant de machigne imbande di Ado, 'e disè adalte vôs: «O Dio Dio cjalàit là, cjalàit là», mostrant un toc di cîl su la zampe.

«Ce îsal?»

«Viódit lassù chêi doi ucêi che si còrin daûr. Cjalàit un dai doi grant ch'al è!».

«Al è un cocâl».

«Nò, nol pò jèssi un cocâl se j dà daûr a chel pizzul. Cjalàit!».

'O cjalìn. Nol jere siguramentri un cocâl. J coreve daûr a chel pizzul cun insistênzies, cun ràbie: robis che siguramentri nol fâs il cocâl, che j sta daûr ai pès.

Ado al viarz di une spane il veri denant de machigne de sô bande par rindisi cont di ce ch'al sta suzedint in tal cîl tra chel ucelat e chel ucelut, e duc' nô a spalancâ i vôi viars di chês dôs creaturis lassù.

«Al è un vidul», jo 'o dîs; «un vidul o une cagnasse ch'al ûl o ch'e ûl lâj daprûf a chê altre animute».

«Ma nò!», 'e dîs la femine.

«Al à reson Meni», al dîs Ado. «Chel vidul o chê cagnasse e' àn chê di brincâ l'ucelut».

'O fermin la machigne su la cjaradòrie par viodi miôr ch'al suzedeve lassù. Un spetàcul.

Il vidul, che par me al jere tâl, al pontave cuintri dal pizzul; ma chest, co il vidul al jere lì par cjàpâlu, jù a plomp; e po' sù, quant che il vidul si butave jù a plomp ancje lui; e po' vie di une bande, e po' vie di chê altre, simpri il vidul daûrj.

Clâr che si tratave di une agression. La femine no oleve viodi altri, che ce ch'e viodeve j faseve impression. Ma nô sì. 'O cjalavin fêrs e incidins lassù chês dôs animis ch'a parevin... vêso mai viodût in timp di uere doi reoplanos tal cîl a cirî, di nemîs, di sclopetâsi l'un l'altri? che un va sù e chel altri daûrj, un al ven jù just a plomp par drezzâsi podopo di colp par tirâj a di chel altri par sot? Ben, precîs!

Chê scane tra i doi ucêi 'o vin stât fêrs a cjalâle par bogn cinc minûz. Po' Ado al crôt ben di inviâ la sô machigne, ancje parceche chê scane j fâs masse sens ae mê femine; e ancje a nô nus fâs câs, che si scomenzave a viodi che l'ucelut al lave pardint snâit, e la partide 'e semeave li li par finîsi.

Ado duncje al invie la sô machigne ch'e à inmò viart di une spane il veri de balconete devant, e propit in chel, che nô 'o vin piardûz di viste i doi protagonisc' di chel numar in cîl, aj jentre come une sclopetade di chel veri viart de bande di Ado un alc... un ucel, ch'al va a bati il so cuarp sul veri devant, par colâ subite su la mènesule de machigne e stâ li par un moment come muart.

La femine, che la besteute 'e je lade a finîle tal veri devant di jê, 'e va par cjàpâle, puare besteute! Ma chê si scjasse, no ûl lassâsi cjàpâ e 'e spacuzze lis alis. E alore 'o voi jo a cjàpâle, ch'o soi sentât daûr de femine, e la cjapi e la ten tes mans ch'o ài fat come une scjaipulute cu lis mês mans, cui dêz distacâz.

'E à il bec viart, segno ch'e je veramentri di mâl. Ma j bat il cûr, ch'o j al sint. Scanade ma vive, cun dute la pôre ch'e à di vê vude dal vidul e cun dute la pache ch'e à batût in tal veri.

Dopo un pôc, che Lelo al orès cjàpâle in man lui par viodi di ce razze ch'e je, e che jo no vuei dâje, 'o viôt i siêi vôi spalancâz jenfri la fressure dai dêz: anzit, 'o j viôt, clâr, nome il voli zamp, di un colôr moron scûr, lusint, une perle!

Dopo un altri pôc ancjemò 'o scomenzi a sintî che mi sgrifuzze la palme de man. Inalore, cjapanle planchin, strenzinle planchin cu la zampe e tirant sù la man drete par podê viòdile interie, dute interie la viôt: 'ne calandre, une spezie di òdule, cun doi sgris tes talputis, un sgrif par talpute, sutil e lunc e pleât.

'Ne calandre: che une volte mi veve dit Sbuelz di Tresésin, cjazadôr di plume come pôs altris, che la calandre 'e jere cussì e cussì, propi come chê besteute che jo 'o tignivi tes mans.

'O sin lâz vie pe asphaltade. 'O vevin lampât il vidul, apene che la calandre 'e jere jentrade te machigne, a svolâ in sù, che prime j coreve daûr, propri tant che un reoplano reatôr di Rivolt co al à chê di fâ il bulo; e 'o disevin s'al jere il câs di fermâsi par meti in libertât chê animele.

«Tirînsi plui indenant», al disè Ado, «in mût di distanzeâsi di plui dal teritori dal vidul», e cussì 'o vin fat.

Si sin fermâz su la drete ch'o jerin 'tôr Tiarz di Aquilée, ch'al jere un fossâl fodrât di palût, e ni cjasis ni nuje, fûr di qualchi boschete atôr vie. Si sin fermâz ch'al jere un puintut a passâ chest fossâl, ch'al puartave tune stradelute di campagne di podê lâ a vøre tai cjamps.

Jo 'o dismonti de machigne e 'o voi sul puintut. Duc' cjale se la calandre, ch'o stoi par molâle, par pojâle dilà dal puint ch'e à dute la campagne devant, 'e rive a svolâ. Cui sa nie, cun chê pôre, ch'e à di vê vude e cun chê pache ch'e à cjapade tal veri!

La poj. 'E sta ferme chel alc alî ch'o la poj. 'E stuarz il cjavut viars di me come par dîmi: «Grâziis», e podopo vie 'e va su chêi cjamps: ne fusete!

La zornade no podeve finî plui pulît di cussì. Si sin fermâz a bevi tun' ostarie che Lelo la veve a pratiche par sêisi fermât plui voltis co al tornave a Udin in biciclete di Grau e 'o vin bevût pe calandre che la veve scjampade. E po' a cjase.

Podopo jo, a cjase bessôl, tal zito, 'o ài fate une riflessione. Il vidul, besteol, a cirî di brincâ chê calandre. E jê a spindi dut


par salvâsi. Sù e jù cun chel ludro daûr, va di ca e va di là, scarte a gjestre e scarte a sinistre cun chês siês puaris alutis di nuje rispiet a chês dal demoni ch'al oleve cjàpâle. E no un àrbul atôr di podê lâ a platâsi, une cjase, un toblât: cjamps di forment a piàrdite di voli e nujaltri. E une cjaradòrie. E une machigne su chè cjaradòrie: la nestre, ch'e veve omps dentri, che jê, la calandre, di gjenerazions e gjenerazions 'e saveve dut su di lôr, e ce gole che lis calandris ur fâsin!

Nome la nestre machigne, e jê propri dentri di chè machigne 'e je vignude!

Lelo al à dite e al dîs ch'e je vignude lì par scjampâ di un pericol reâl rapresentât dal vîdul, dulà che nô invezi, tal ultin, 'o rapresentavin un pericol in forsi.

Pò stâj che Lelo al vebi reson, ma jo 'o soi content instès. Alc al è alc. Tra nô e il vîdul, nus à sielzûz nô.

M.



Aquerel di Meni Ucel

LA ONESTÂT DI MÊ NONE

*Quant che mê none il nono lu à burît
no à fat come chês tantis che si pant
che dopo un pôc a' cjàtin fûr l'amant.
In cinquant'agn jê no lu à mai tradît.*

*'E conte che une volte un rimbambît
che j veve fat la cort, un benestant,
j veve dit: «Lu viôtu chest brilant?
ven, ch'o t'al dói, a cjólilu in chel sît».*

*A un tant un'altre pueme interessade
j varès dit subit ch'e jere pronte,
ma la mê none, oneste, no je lade.*

*Anzi j à dite: «Vami vie, baban!»,
tant che ancjemò, la volte che m'e conte,
no lasse stâ di muàrdisi la man.*

TRILUSSA

(Traduzion di Meni)

Graduâr

Il barbe Checo al jere sentât ta l'ostarie di Nino a Caprive ch'al beveve ben planc il so tajut di blanc.

A un dêt moment a' jèntzin in tal locâl uns quatri di lôr fevelonant a dispiet un dal altri: un al diseve che in timp de prime uere mondiâl, sot da l'Austrie, al jere «Ober Korporal», un altri ch'al jere stât «Feldwebel», un altri ch'al jere stât «Oberjäger»; insome duc' graduâz, cui plui cui mancûl.

Dopo tant cjacarâ, un si volte e al viôt il barbe Checo che, cul cjâf bâs, al bateve plancut cu lis pontis dai dêz de man drete su la taule come su un tamburel. J va dongje e j dîs: «E vô, barbe Checo, ce jèriso?».

«Quant? Dulà?», j rispuint il barbe.

«In timp de prime uere mondiâl, ce jèriso? Caporâl? Sargjente? Maressiâl?».

«Jo, benedet, in chês volte, se t'ûs propri savê, 'o jeri stuf».

BEPI DI DIANA

DIARI

*Un dizionari gnûf al è jessût.
Chel che lu à fat al dîs ch'al à metût
dîs agn par fâlu. 'O pensi:chel fantat,
in chest dîs agn, ce no varèssial fat?!*

M.

27 dicembar '85

La agne Sunte

La agne Sunte 'e veve une mieze dozene di fruz, e cussì une sabide soresere, ch'e veve dezzidût di smondeâju duc' un daûr l'altri, 'e lè a cjólint un in tal trop ch'a zujavin tal savalon, lu metè dentri te pòdine plene di aghe e e scomenzà a lavâlu. Il frut al smalitave, al oleve dî alc, ma jê no lu lassà dî nancje un chic, e lu savonà.

Il barbe Tunin, rivât a cjase un lamp dopo, al viôt e j dîs ae sô femine: «Po' Sunte, di cui îsal chel frut che tu stâs lavant?».

«Ma di cui ustu ch'al sedi, Tunin benedet? Un làzar dai tiêi ve'!».

«Eh nò femine», j dîs l'omp, «prove a cjâlâlu miôr e tu viodarâs che nol è nestri chel lì».

La agne Sunte lu cjale, j tire sù i cjavêi che ju veve a slàs su la muse e 'e dîs: «'Orpo, tu âs reson tû. Nol è nestri, nò; al è un fi de Pierine chel chi!».

«Lu ài cognossût subit, jo», j dîs l'omp.

«Poben, cjale mo, za ch'o soi daûr, 'o j dói 'ne sbazziade instès ancje a chest».

BEPI DI DIANA

CJAZZADÔRS

*Un cjazzadôr al va cu la doplete;
e al cjale sù a di un pont, e al cuche clâr
un mierli sun tun cuâr
di un uâr tune boschete.*

*'E je duquante une armonie d'amôr
imbombade di lûs e di turchin
ch'e jemple il cûr di pâs tal cidinôr!*

*Cemût lu clamarîno un cjazzadôr
che j smire e j sbare a di chel puar plumin?*

TRILUSSA

(Traduzion di Meni)

IL LITRAT

'Zuan Pauli Gri tal so studi «Lo scenario funebre della Val d'Arzino» al scrîf che «... l'uso della fotografia applicata alla lastra arriva anche al macabro: nel caso di bambini dei quali la famiglia non possedeva ritratti, si fotografava il morticino... con risultati che ancora sono visibili in tutti i cimiteri della zona».

Poben, leînt chest particulâr, mi soi visât di un fat ch'al mi contave gno pari (lui al faseve il fotografo: il «fotografâr» al diseve il so amî Toni) a Martignà.

Tal nestri câs no si tratave di un frut, ma di un omp. La sô femine, cun chê di vê almàncul un litrat (che no' 'ndi veve nancje un), 'e clamà gno pari.

Lui, cun dut ch'al cirîs di alzâ la machigne fotografiche sul cavalet, nol rivave a inquadrâlu ben: masse di sbighet!

Alore gno pari al domandà ae femine, cun chê di fâsi dâ une man: «Mènie, si puèdial alzâlu, metin'j un pâr di cussins daûr?».

E jê: «Po, Pieri, tu puedis butâlu ancje tal ledanâr che lui no ti dîs nuje, veh!»

LÙZIO PERÈS

Scais

Pieri Saete al lavorave tal Cantîr di Monfalcon come eletricist.

Come eletricist al jere veramentri brâf, come omp di cjase, invezi, al jere ce ch'al jere, e une vøre dispès nol rivave a consegnâj 'e femine la quindisine ch'al tirave in Cantîr.

La femine, dâj uê dâj doman, si stufà, e 'e lè a protestâ lî dal diretôr dal Cantîr.

Il diretôr lu clame e j fâs une ramanzine di chês.

E lui: «Siôr diretôr al à reson lui; ma il fat al suz-zêt parvie ch'o soi lontan di cjase».

«Cemût lontan, se dal puarton dal Cantîr a cjase tô no son nancje sîs chilometri, che tu puedis fâju in mancûl di miez'ore?».

«Siôr diretôr sì, ma lui nol sa che lunc la strade a' son disesiet ostarîis...».

*

Une dì a buinore 'o cjati Gjldo, di Romans, cun tune muse lungje che Diu nus vuardi.

«E alore, Gjldo», j dîs, «îsal alc che nol va?».

«Po tâs! Mi insumiavi di mangjâ une plâdine di

lidric cun ûs dûrs. Finîť di mangjâ, 'o ài cjavât sù il butilion di neri e lu disvuedavi te plâdine; e propit in chel ch'o vevi cjavât sù cun dôs mans la plâdine par clucâ chel rosolio, po no rivie la femine, chê bestie, a sveâmi par lâ a vøre, ch'o la varès strangolade!».

VICO BRESSAN

La plui part dai omps 'e lemente la malignitât de nature parcè ch'o sin gjenerâz a une cussì curte esistênzie, parceche la misure dal timp che nus è dât si cunsuma tant in premure che, gjavant quatri pôs, la vite 'e lasse i omps tal moment che si dispônin a vivi.

Ma nol è che nô 'o vébin poc timp: al è ch'o 'n' piardìn une vøre; nol è ch'o vébin vude une vite curte, ma la vin fate tâl; no sin puars di esistênzie, ma pròdics. I omps a' vivin come s'a vessin di vivi simpri, dismenteant la precarietât de lôr esistênzie; a' piardìn il timp come s'al vignis fûr di une font plene e bondante, adulâ che forsit la stesse zornade che lôr j stan daûr a di un omp o a un afâr 'e je la ultime de lôr vite.

LUCIO ANNEO SENECA



Marz

Anunziazion dal Signor, 1672-1734
Sant'Anna o Fraterna degli Osti, Palma.

III

✠ 1 D S. ALBIN

2 L S. Simplizi

3 M Cunegonde

4 M *La cinise*

5 J S. Romeo

6 V S. Luzio

7 S S. Perpetue

✠ 8 D S. GJRALT

9 L S. Franzescje Romane

10 M SS. Quarante Mårtars

11 M S. Costantin

12 J S. Bernart

13 V S. Patrizie

14 S S. Matilde

✠ 15 D S. LUISE

16 L SS. Ilari e Tazian

17 M S. Patrizi

18 M S. Ciril di Jerusalem

19 J S. Josef

20 V S. Claudie

21 S S. Benedet

✠ 22 D LÈE

23 L S. Fedèl

24 M S. Simeon

25 M *La Nunziazion dal Signôr*

26 J S. Emanuel

27 V S. Guste

28 S S. Sisto

✠ 29 D S. SECONT

30 L B. Amedeu di Savoie

31 M S. Beniamin

Marz al è mat, ma se tu sâs cjapâlu
nol è chel mâl. Tal ort tu pûs svangjâ,
tu pûs coltâ chel strop par semenâlu,
montâ sul brugnulâr a dispedâ.

Podopo tu pûs lâ, co il frêt al cale
e a' bûtin fûr lis vîz i lôrs vergons,
atôr par cjamps e prâz a cirî tale
e jenfri lis cjarandis a urtizzons.

M.

MARZ

Un mès propit malcujèt, Marz. Al è simpri stât cus-sì, e nol à mai valût che la int si lamentassin o magari ch'a protestassin. Ma ce àno mo di dî, la int, co al è propit cun Marz che l'unviâr al passe. Si capìs che j ûl qualchi sfuarz par fâlu passâ, e Marz al si sfuarze.

'E int ur dâ fastidi i sfuarz. A' orèssin che Marz al fos come Maj, senze ajarât, senze un pêl di frêt restîf, senza un nûl. Mai contenz, la int! E Marz a sfuarzâsi e a patî, chal è masse bon: ma qualchi volte j fâsin vignî sù une fote grandonone a sun di bruntulâ, lui al polse un pôc e al lasse viarte qualchi sfese, in mût che l'unviâr al rivi a sburtâ fûr lis sôs ultimis tristériis di glazze e magari di nêf.

Cetante nêf no mèrtino la int, di Marz? Co a' mèrtin ancjemò tante nêf, al ûl dî che l'unviâr nol é stât avonde trist. J ûl unevore di tristérie par che la int a' stéin bogn.

Ma alore, covèntino propit vueris e misèriis par che i omps a' stéin bogn-e ch'a lassin in pâs almancul il mès di Marz, ch'al à un biel cefâ a lotâ cuintri dal frêt e dal scûr dal unviâr! E par cui lu fâsial, che ae int miôr ur va e plui a' cjàtin ce dî!

L. C.

VIARTE

*La vite 'e à une menade gnove:
tanche i vencjârs
lizêrs e sutîi
ch'a scorèin lis ultimis bugadis
dal Cividin
e a' si plèin senze pôre
a cjarinâ la tiare mari
ch'e bute sù scalmanis
e bampis di zoventût.*

GLOVAZ

TRESEMANIS

Checo Beât la veve fisse cun duc' i sportîfs, balonîrs, saltadôrs, coridôrs: «Dute int che no à nie ce fâ», al diseve. Ma soiredut la veve a muart cui coridôrs di automobil. «Parceche», al diseve, «chêi a' son chêi ch'a dâ il piês esempi 'e 'zoventût. No stin po' a lamentâsi se i 'zovins si compuàrtin mâl! Vêso mai viodude une gare di automòbii? Ben, lì, co i coredôrs ti àn dibisugne di alc, si fèrmin ai box, a' fàsin il plen di benzine, magari si fàsin cambiâ ancje lis gomis, po' a' scjàmpin senza pajâ. Mai viodût un coridôr a tirâ fûr un franc jo! Propit un biel esempi pe 'zoventût!».

*

Toni Minel, stuf di barufâ cun so pari, une dì, in-rabiât a muart, j veve metût un disjarbant te mignestre. Ur contave la part ai siêi amîs ta l'ostarie e chesc' j domandavin: «E alore, il vieli, îsal muart?». E lui: «Nu-je! J son nome colâz i cjavêi».

*

Si vantave di séi nassût comunist, e veramentri al jere tant comunist che duc' lu clamavin Meni Russie.

Une gnot, tôr lis tre, ch'al tornave a cjase pe strade vecje cu la biciclete senze ferâl dopo di sêi stât al Festival de Unitât a Tavagnà, su la curve daûr il Morene, che si clame il volt dal gnèur, i pulizais de strade lu fèrmin e j dîsin: «Documenti».

Lui j dà la cjarte a un dai doi ch'al lèi adalte vôs: «Scafandro Domenico, siete voi?».

«Sigûr ch'o soi jo», al dîs Meni e al zonte, «detto Meni Russie».

«Bene bene», al dîs il pulizai, «Scafandro Domenico. Nato?»

E Meni, indignât: «Ce Nato ce Nato! Jo 'o soi di chêi dal "Patto di Varsavia!"».

ALAN BRUSINI

Un bon matrimoni al sarès chel tra une femine vuarbe e un omp sort.

SCLARIDE DI MARZ

*Niulis blancjs
e niulis neris
s'incrósìn tun cîl
sglonf di primevere.*

*Une scove di vint
'e sledrose la ploe
ch'e lûs
cuintri un rai di soreli.*

*Sui rivâi de ferade
il timp gnûf al fluris
denti i vôi dai noglârs.*

*Aghe e vint a' sbilissin
i cuârs di un lacai
sun tun céi di fossâl.*

*Di bielzà tra i ramaz
al disgote il turchin
de sclaride di marz.*

MARIO ARGANTE

LA LUNE E LA LÙSIGNE

*La lune, che la gnot 'e indarintave,
gloreôse, a di une lùsigne j babave:*

*«O lusignute, tù, là che tu vâs',
ma ce flamute làmie che tu âs!».*

*«Tu puedis vê reson», j rispuint chê,
«làmie, minude, mîsare, ma mê!».*

M.

(Daûr di Trilussa)

CHECO IL LEGJONARI

Checo, sot dal Duce, al veve fate la uere come legjonari tant in Afriche che in Russie. Duc' a' son cunvînz che jéssi legjonaris in chê volte al volès dî jéssi dal plui sfegatâz dal Fassio e notâz volontaris te Milizie Volontarie Sigurezze Nazionâl. Stant a chel ch'o sai jo, 'o puès zurâ che Checo sfegatât nol jere gran e che, se mai al fòs lât a notâsi te Milizie di sô spontânee volontât, di sigûr lu fasè plui par dibisugne che par fede, che la miserie, in chê volte, si la jevave duc' di pês.

Checo al veve fate dute la sô uere simpri in prime linee, che dome chest al veve di jéssi il puest dai legjonaris, e, di onest ch'al jere, ancje se no masse convint, al veve fat il so dovê, pûrpûr, al vè la buine sorte di tornâ.

Quanch'al tornà da l'Afriche, in paîs si fasèrin duc' intôr di lui, par savê des batàis e des conquistis, dai neris, de civiltât che l'Italie imperiâl 'e veve puartât in ta chês tiaris di salvâdis.

E, alore, duc': «Cemût in Afriche, Checo? Cemût?».

E lui: «Cjalt! Cjalt!».

Ancje quanch'al tornà de Russie, in paîs, si tornàrin a dâ dongje e parinc' e capuzzaz e amîs e cognosînz e duc' a volê savê, un a dispîet di chel altri, dai ne-

veòns di chei sîz e di chês tavielis, des cjasis e de sgrime di chê int senze Diu, dai mostacjons di Stalin.

E, alore, duc': «Cemût in Russie, Checo? Cemût, ah?».

E lui: «Frêt! Frêt!».

Nissun nol rivà mai a rigjavâ nuje altri di chê boje, sibèn ch'e fôs di un legionari!

ALVIERO NEGRO

Al è plui nezessari studiâ i omps che no i libris.

FRANÇOIS DE LA ROCHEFOUCAULD

I CÈCS DI DOLFO

Dolfo al veve vinzude une buine sume al lot, e daûr un consêi di Gjero al lè a pojâ i bêz in bancje.

«Cumò us dói il blochet dai cècs», j disè il diretôr de bancje; «cussì 'o podarês pajâ ce ch'ò varês di pajâ scrivint parsôre dai sfuéis la sume di dâ e metint la uestre firme sot vie, senze puartâ atôr monede».

Dolfo, cul blochet dai cècs te sachete, al lè tal Consorzio a pajâ ce ch'al restave di pajâ pal tratôr, po' al lè te buteghe di coloniâi, in chê de panine, lì dal mecânic, dal vitrinari, dal miedi, ch'al veve alc ce dâ, po' dal predi, ch'al veve di pajâ la Messe ch'al veve fat dî sîs mês prin par so pari.

Apardut al scriveve sui cècs la sume che j disevin, al meteve la firme e al butave il sfuejut su la taule disint: «Cumò 'o varês finît di scuédimi».

Dopo tre dîs di cheste gjle, il diretôr de bancje lu mandà a clamâ e j disè: «'O sês fûr cui bêz».

«Cemût mo», j dîs lui.

«'O sês sot!».

«Cemût sot!».

«'O vês faz masse cècs, par plui bêz di chêi ch'ò vevis in bancje, e cumò 'e bancje 'o vês di dâj tant...», e j dîs la cifre.

Dolfo al scolte, al tire fûr dal sachetin l'ultin cèc

ch'al veve, j scrîf la sume che il diretôr j veve dite, lu firme e j al bute al diretôr su la scrivanie disint: «Eco ca. Cun chest cèc lu ài pajât ancje lui. E par chê maniere ch'al à vût di scuédimi nome dopo tre dîs, no meta-rai plui pît in ceste bancje fin 'ae fin dai sècui».

SERGJO VISENTIN

Cèc = chèque

*Signôr,
dajmi la speranze e l'onôr,
bêz di spindi,
fasûi di vendi,
un fantat biel e bon
e bon paron.*

*Signôr, jo no us domandi nujaltri:
il paradîs in chest mont e in chel altri!*

LA VUERE STELÂR DES COLIS

La reclami aromai 'e à savoltât il mont, al pont ch'al pâr che duc' a' sêin diventâz maz. Al vâl in proposit l'esempli de Coca Cola e de Pepsi Cola.

Daûr di ce ch'e à vût contât la stampe, la Coca 'e à protestât cu la NASA parceche la navute spaziâl «Challenger» 'e à puartât in orbite no dome che il cuntignidôr de bibite ideât apueste dai siei spezialisc', ma ancje un altri parferît de Pepsi: stant a ce ch'al jere stât cunvignût, la Coca 'e varès vût di jessi la prime agarole gasade a lâ tal spazi.

Ma la NASA 'e à ribatût che nol è vêr ch'e sêi stade cheste cunvigne cu la Coca: che anzit l'ent spaziâl merecan al veve vût invidât duc' i produtôrs di aghis gasadis a presentâ cuntignidôrs di sperimentâ tal spazi in mancjanze de fuarze di gravitât, in mût che i astronaut, finalmentri, no vëssin di scugnî contentâsi di aghe, strucs di pomis e cafè, di bevi cu la canucje, ma a' vëssin la pussibilitât di gjoldisi lis agarolis cul gas.

Tal spazi, alore, no je lade dome la Coca, ma ancje la Pepsi. Ma in realtât cheste vuere stelâr 'e à 'zovât a duc': ai astronaut, ch'a saran in cundizion di sielzi tra Coca e Pepsi, e, soledut, es dôs ditis, ch'e àn fat 'es lôr Colis une propagande tâl di sigurâsi buinis jentradis cu lis venditis 'es sdrumis di int di dute la tiare. A' saran altri che cuviartis lis spesis des rizercjis par fâ i cuntignidôrs, che la Coca 'e à vût spindut un miez miliart di francs! Pensait ch'al è in projet di meti in vendite lis pizzis surgjeladis cubiadis su lis Colis, e chest al sarà un «fast food» ch'al fasarà lusingis.

Un'altre curiosetât, che salacôr si pò metile in relazion cun chês des Colis, 'e je chês di cinc films ch'a rivuardin il «Planet des simiis». A' disin che lì ret si conte di un mont dominât di chei che, daûr di Darwin, a' saressin i nestris progjenitôrs e, daûr di Boule - un scritôr - a' saran ancje i nestris erêz.

L. C.

L'ernie di Visentin

Aromai pratics di ospedâl, tanc' no acêtin di lâ tes bielis cjamarutis dai pensionanz. Nol è parvie che si trate di frontâ une spese e che dopo a 'n' restarès di mancûl di lassâ ai erêz: al è, invezzit, che a jéssi bessôi, ancje se la cjamarute 'e je biele e se lì si à dut ce che si pô olê, 'e mancje la ligrie.

Si sa che i malâz dai ospedâi e' àn une lôr ligrie, ch'e je chê che ur covente di plui, e che tal ospedâl di Udin si à ancjemò une ligrie propit di stamp furlan.

Un esempi di chesc' dîs.

Visentin al va tal ospedâl. 'E je la prime volte e, 'za prin di jentrâ, al à pandût te zitât e tal dulintôr il so pinsîr, ch'al è chel che lui nol è mai stât a fâsi tajâ e che cumò j tocje di lâ, par fâ l'operazion da l'ernie. Cussì al è vegnût a savêlu Noni di Godie, ch'al è tant timp ch'al à ancje lui l'ernie, ma che nol à mai vût timp di stâ a pensâj parsore, parvie che lui al pense simpri al Friûl, e Sgorlon al à vût scrit sul «Piccolo» che nol covente insegnâ il Furlan tes scuêlis. Chel scrit lì Noni lu à sul stomi e j fâs vignî sù une fote che mai; cussì, invezzit di pensâ a l'ernie, al pense ai canons che j coventarèssin par bombardâ i Sgorlons. E cuissà se il «Piccolo» j publicarà la letare che lui j à mandade.

«Viôstu, Visentin», j dîs un amî, «chel Noni là, cul

so ideâl furlan, la sô ernie nancje no la cognòs. No j covèntin miedis ni operations, che j baste Sgorlon. Cjâtiti ancje tù qualchi brâf scritôr, e tu sês vuarît!».

Ma chest discors dal amî al è risultât sbaliât dal dut.

Passâz pôs dîs, Noni, sintût ce che j à dit il miedi a Visentin sul cont da l'ernie, al decît di jentrâ ancje lui tal ospedâl par chê operazion. Par disfortune, però, nol rive a calcolâ cun precision i tims e nol intive la zornade e l'ore juste di jentrâ: al va a finîle, alore, no dongje dal amî, a fevelâj di Friûl, ma in prime Chirurgje, là che i malâz no stan nancje a sintîlu e, anzit, si stûfin e a' protèstin.

A Visentin j vevin sigurât che l'operazion da l'ernie, vuê, cun duc' i progrès de chirurgje, 'e je une robe di nuje, ma lui, dopo fate, a cui ch'al è lâf a cjatâlu, j à dit: «Bisugne provâ!». Che lui, îr, par oris, al à vûz di chêi dolors, di no augurâjai nancje al piês nimî, e che in avignî a cui ch'al larà a ròmpij lis scjâtulis j disarà: «Che ti vegni l'ernie!».

A cjatâlu al va ancje Noni. Fate ancje lui l'operazion. Cemût?! Visentin tal jet e Noni, dut blanc di cjavêi ch'al è plui intimpât, 'za impins e ancjemò dut sportîf, cui bragons curz, rivât cu la biciclete, plen di energjis, pront come simpri a fevelâ di Friûl. Difât, al tache subit.


Par Noni, l'operazion da l'ernie 'e je stade pardabon une robe di nuje. Salacôr 'e sarès stade tâl ancje

se la chirurgje no vès fat duc' chêi progrès, che lui al
à un spirt fuart.


Si viôt che Visentin, cun dut ch'al è un bon fur-
lan, nol sa crodi al Friûl cun dute la fuarze ch'e covente.

L. C.

Un omp di caràtar al è squasi simpri un omp ch'al à un brut
caràtar.



April



Pasche, 1482-1705
Libro d'Instrumenti e legati.

IV

- 1 M S. Ugo
 - 2 J S. Franzesc di Paule
 - 3 V S. Irene
 - 4 S S. Isidoro
 - ✠ 5 D S. VIZENZ FERRERI
-

- 6 L S. Celestin
 - 7 M S. Zuan Batiste de la Salle
 - 8 M S. Redent
 - 9 J S. Marie Cleufe
 - 10 V S. Terenzio
 - 11 S S. Stanislau
 - ✠ 12 D DOMENIE ULIVE
-

- 13 L S. Gjldo
 - 14 M S. Valerian
 - 15 M S. Anastasie
 - 16 J S. Lambert
 - 17 V S. Nicete
 - 18 S S. Galdin
 - ✠ 19 D PASCHE
-

- 20 L *Pascute*
 - 21 M S. Selmo di Aoste
 - 22 M S. Caio
 - 23 J B. Eline Valentinis
 - 24 V S. Fedel
 - 25 S S. Marc vanzelist
 - ✠ 26 D OTAVE DI PASCHE
-

- 27 L S. Zite
- 28 M S. Vidâl
- 29 M S. Catarine di Siene
- 30 J S. Piu X

VI

Avrîl, 'ne glorie! La campagne 'e tove.
Atôr atôr il vert al cjape pît.
Il riz si viarz e al salte fûr de cove,
il mierli al zorne, biel dant dongje il nît.

E la lisiarte 'e lasse la frissure
di chês murae là ch'e à passât l'unviâr
e 'e va a postâsi lungje, crêature,
sul clap là che il soreli j fâs acjâr.

M.

AVRÎL

Cui ch'al dîs mâl dal Avrîl, al dîs mâl dal cîl.

Difat, mai come in chest mês si vîsisi che il cîl al è celest e ch'al fâs bieles la tiare cun dut chel so grant vert... Grant vert? Di dut chel vert, al jere restât juste qualchi strop di lidric e salate, e ancje chel di no podê gjóldilu parvie di Chernobyl, che nus vignarà il càncar tra dîs agn.

Intant, prime dal càncar, nus ven altri. No dome qualchi rafredôr o qualchi crisi di guviâr, ma il fat che propit l'Udinês, la nestre squadre, 'e je passade in B! E il piês al è che il president dai diletanz dal balon al scuén vaî parvie che ancje culî e ancje sul sport si vebi cjatât alc di sporc.

Prime si diseve dome che la Mafie 'e jere une robe sporcje: po si à vût cûr di dî ch'al jere sporc il mont dai afârs; infin, simpri plui int e' àn tacât a dî ch'a sarèssin sporcs i ambienz de pulitiche... Al restave fûr l'ambient dal sport, fat di 'zovins sans che no si dròghin, che no van daûr dai rollings o dai punks e ch'a son la speranze dal avignî.

Se si varà di vaî ancje su la speranze, l'Avrîl nol varà plui il so celest, e la colombe di Pasche si compràle che tal so presit 'e sarà comprendude la percentuâl de Mafie.

L. C.

Dubia

La Franca 'e veve une grande amie di frute: la Mina.

La none no rivave adore a fâj fâ nuje 'e Franca, la Mina dut.

Une dì la Mina j dîs 'e Franca: «Franca, va a cja-pâmi sù la robe picjade a sujâ tal ort».

La Franca 'e va tal ort di Pole, 'e cjape sù toc par toc, 'e plèe, e 'e poe jù dut su la jeche. Ma po' j ven un dubi: àe propri di cja-pâ sù ancje «chel» capo?

«Mina», j berle 'e Mina stant tal ort in mût che la sintin fintremai lassù di Busan e lajù de Stazion, «Mina, ào di cja-pâ sù ancje il "tetâr"?».

D'in chê volte dutis lis feminis di Biliris e' àn savût cemût clamâ chel capo di blancjarie. Ancje i omps.

P. S.

La pazienze 'e je la plui eroiche des virtûz apont parceche no à nissune parvenze di eròic.

GIACOMO LEOPARDI

SCAMPANOTADE DI PASCHE

*Cheste matine sul cricâ di
'o soi tornât a cori
pai prâz lontans de mê vite
par cirî Paschis di paradîs,
e un àgnul vistît di lûs
mi à ciscât cun tun respîr:*


*«'E je Pasche pai pinsîrs segrez
ch'a rîvin 'e lûs de cussienze
disvuluzzansi des vieris pôris.
'E je Pasche pai progjez apene inviâz
ch'a spiètin une soflade
par svolâ sôre lis oris pégris».*

*Dal cîl e de tiare
(no sintîso ancje ualtris?)
nus rive il concert de vite,
la scampanotade dal creât
ch'e spant a zumiele
cjantôsis di fieste
regaladis ai fruz di ogni etât:*

*«Pizzule, cjante,
fuarze mezzane,*

*glone tù, grande,
fin ch'al è dî.
Biele la vite!
Tégnile cont;
gjórdile legri
fin ch'al è mont».*

G.



Beca

Berto e Mario a' jerin ferovîrs frenadôrs, di stàn-zie a Udin. A' jerin amîs, ma quant che si cjavavin tal bevi a' cjavavin simpri da dî. Par monadis.

E alore une di che Berto al stave par partî di Udin par Tàrvis adulà ch'al veve di fâ la gnot, Mario, che si fermave a Udin, al quistionave cun lui. J diseve: «Macaco che tu sês un!»

E Berto: «Macaco tu sarâs tû!».

E Mario: «Stupidat che tu sês!».

E Berto: «Stupidat tu sês tû!»

E Mario: «Cjavon!».

E Berto: «Cui ch'al fevele!».

E Mario: «Va, va a Tàrvis, batocjo e nujaltri; e intant la femine... a cjase...».

E Berto: «E cun chest?».

E Mario: «T'al dîs: tu sês bec!».

Lì dongje al sintive lis peraulis dai doi un tiarz amî, Fredo. Fin quant che chêi doi si davin dal macaco, dal stupidat, dal cjavon, Fredo al taseve. Ma quant che il Mario j dè al Berto dal bec e al viodè che il Berto no s'e cjavave, nol podè stratignîsi dal dîj: «Ma Berto, Mario ti à dât dal bec e no tu t'e cjapis? e no tu dâs sù? no tu rispuindis nuje?».

«Nò, nuje».

«Ma cemût?»

E Berto: «S'o soi bec al ûl dî che la mê femine 'e fâs gole, che la mê parone 'e je biele; cussì no puès no tignîmi in bon. Lui, invezi, cun chel tomât di cristiane ch'al à...».

U.

Se un amî ti domande bêt ad imprèstit, pense ben se ti conven di piardi il prin o i seconz.

VIARTE DAL MÂR

*No son turisc', e vuê il mâr
al à un soreli blanc:
si è impiade la cueste,
al è il mâr ch'al semene
lis sclipignadis blancjs
ch'a flurissin a colp
su la roste di claps.*

*Viodûz i colôrs?
Vuê, tal viart, lavè,
il mâr al parferîs, ce sàjo?
chi un vert piât, là dongje un viole,
e ventilà un celest sb lancjât
ch'al si confront cul cîl strafont di lûs.*

*Ma doman,
se tu sarâs doman il prin su la buinore,
alore il mâr al sarà dute une rose,
la rose plui delicade, la rose
plui luminade, la rose
plui rose, flôr de flôr, amôr
di rose, biel, cu l'anime, dut viart.*

L. C.

AVRÎL

*Al ûl séi pardut
il gno cûr di frut
imò di screâ...*

*E cori, svolâ
par simpri, lontan...
Dulà, ma dulà?*

*Al rît il doman
co atôr al è avrîl,
la vite 'e je un cîl.*

*'O rît tal soreli
cjantant par cjantâ,
i vôi come un spieli.*

*E po'? Cui sa mai...
Ma chi, al infinî, t,
ch'al resti sculpît
un grîsul di maj...*

DINO VIRGILI

Il bocâl

Jo, gno fradi Panzete, Pisto de Dosche, Zurche, Nejo, Turo Menon e altris 'o lavin a vøre a Udin cul tram di Tarcint; jù a buinore e tornâ a cjase la sere. Dal '30.

E alore un dì a buinore 'o jerin sul tram sentâz su lis nestris bancjutis in spiete di partî par Udin, quant ch'a végnin a sentâsi alì dongje une femine e un frut sui vot agn.

Nie di strani. Une femine e un frut. Ma chest frut 'o viodèrin ch'al veve fassât il cjâf 'toratôr cun tune piezze blancje fin a cjapâj lis orelis, e che, sul devant, j lasave juste i vôi libars, che j taponave fin il sium dal cjâf. Un parecjo che il cjâf dal biadin al semeave un zèi.

'O cjalàrin il câs, e 'o notàrin che il frut, sentât compost su la bancjute dongje de femenute, lis mans sui zenôi, al sustave; e la femenute, minudine, senze etât, viestude a la buine, il fazzûl sul cjâf e i scarpez in tai pîs, lu scjassave e j diseve ch'al tasès, a basse vôs, ogni tant, cun brute maniere. Ma parcè scjassâlu in chê forme e fevelâj cussì a brut?

Turo j domandà a cheste femine: «Parone, ìsal so chel frut lì?».

«Po' sì ch'al è gno, chel ludro!».

«E ce àial fat ch'al è fassât in chê forme?».

«Al sa ben lui ce ch'al à fat, chel mostro!»; e lu scjassave indenant. E a di un pont, quant che il canai al sustà plui a fuart, j dè un croc cu lis àinis sul cjâf ch'al semeà che chel croc lu vès dât sun tun cit, e po' j 'n' dè un altri, e po' un altri ancjemò.

Fin che tant Turo che Zurche e che Nejo a' larin li de parone a berlâj: «Ma ce cûr vêso di dâj in chê forme a chê creature? No viodêso in ce stâz ch'al è? No us fâsial dûl, puar frut?».

«'O sai ben jo ce ch'o fâs».

«Nol è just».

«'O sai jo s'al è just».

«Sù, mo, parone, stait buine».

«Ce buine ce buine! Savêso vualtris ce ch'al à fat chest demoni? E ce che jo 'o scuen spindi cumò in timp e in palanchis a reson di ce ch'al à cumbinât?».

Al jere suzzedût che la sere prime al jere lât a dormì adore, e denant di pógnisi al veve scomenât a zujâ cul urinâl. Lu veve metût sul so cjâf voltât par in jù e lu veve tirât pe màntie e pal órli fin a cjapâ dentri dutis dôs lis orelis. E cui jèrial stât bon, dopo, di gjavâ fûr di li chel bocâl ch'al jere di fiâr smaltât?

«Tal ospedâl duncje», 'e diseve, «a spindi bêt e a piardi timp, cun tant ce fâ ch'al'è in cjase. Mertàvial e mèrtial o no, alore, chêt crocs?».

M.



May

B.V. di Screnchis, 1794

Catastico dei Beni della Fraterna della B.V. di Screnchis di Bertioło.

V

- 1 V *Fieste dal Lavôr*
 2 S S. Atanâs
 3 D SS. FILIP E JÂCUN



- 4 L S. Gotart
 5 M S. Pelegrin
 6 M S. Gjudite



- 7 J S. Flavie
 8 V S. Ide



- 9 S S. Gjeronzi
 10 D S. ANTONIN

- 11 L S. Fabio

- 12 M S. Nereo

- 13 M S. Eme

- 14 J S. Matie

- 15 V S. Torquât

- 16 S S. Ubalt



- 17 D S. PASQUÂL

- 18 L S. Venanzi

- 19 M S. Ivo

- 20 M S. Bernardin di Siene

- 21 J S. Valent

- 22 V S. Rite di Cássie

- 23 S S. Desideri



- 24 D S. ESTER

- 25 L S. Bede

- 26 M S. Filip Neri

- 27 M S. Urban

- 28 J S. Milio

- 29 V S. Massimin

- 30 S S. Gavin



- 31 D LA SENSE



Maj al è il mês che il cîl al innamore
des monz al mâr e ch'al incjante il cûr;
e che di un vert lusint al incolore
vignâi, tavielis, bràidis dulinfûr.

O vualtris, frutis mês ch'o stais in scolte,
no si visàiso uê dulà ch'o sês
des seris ch'o cjantavis une volte
lis glòriis de Regjne di chest mês?

M.

MAJ

Cul dî che Maj al è il mês dai garofui, si intint ch'al è ancje il mês di bielezze. Ma cumò, co no je plui chê bielezze, si pò dî che chest mês nus mancje.

L'inteligjenzie dal inteletuâi ch'a triònfìn tal nestri timp le à condanade. Se tù tu viodis un biel garoful, un biel amont o une biele lune, ti dispresèin che tu sês ancjemò un romantic; se ti plâs une biele puisie, ti dîsin che tu sês ancjemò ta l'arcadie; se tu âs une biele ciere, no pénsin che tu steis ben, ma che tu seis un puar biât, che ti mancje il sens critic e duncje al è parchel che no tu sês problematic e pluitost mareôs e rabìn come lôr.

E la int? La int, daûr da l'ande, ur dâ reson ai inteletuâi, ch'a son propit in tanc' che dome cussì a' cródin di semeâ inteligjenz. Difât, daûr dai inteletuâi, chêi tanc' a' pénsin che dome in ce che la biade int restade indaûr 'e stime «brut» si puedi cjatâ qualchi interès o magari qualchi gnove rivelazion culturâl. Cussì, apene ch'al ven fûr alc di brut, al cjape a colp: e' àn cjapât lis braghessis frujadis e imblecadis di mode come la piture «pop» ch'e presente cessos e garbatui antipatics, lis musichis ch'a sturnissin parfin i sorz, il brut gust clamât «kitsch» e chel orent dai punks, il Talian

cui pronons sbaliâz e bastardât cul Inglês...

*Ce maraveâsi, alore, che il mês di Maj nus mancj?
E chêi altris mês, cemût ju vino?*

L. C.

Cjalàit cetant che i omps a' ingjànin lôr stès: ognun al cunsidare
bruz i pecjâz che lui nol fâs, e lizêrs chêi che lui al fâs; e cun cheste
règule si misure dispès il mâl e il ben, plui che cul cunsiderâ i grâz
e lis qualitâz des cjossis.

FRANCESCO GUICCIARDINI

LA PARTIDE

Carleto al jere un patît dal zûc dal balon, e in chê domenie che a Udin 'e varès zujât la Udinêse cul Milan j veve dit 'e femine ch'e parecjàs di gustâ prin dal solit.

«Femine», j veve dite, «parecje di gustâ daurman par ch'o puedi rivâ a cjapâ un bon puest in tal cjamp che la partide di uê 'e merte di séi viodude pulît».

«Cui îsal ch'al zuje?», j veve domandât jê.

«La Udinêse cul Milan».

«Alore uê 'o ven tal cjamp ancje jo», 'e veve dit jê.

'E veve parecjât di gustâ prin da l'ore e po' a' vevin gustât. E po' jê si jere metude a lavâ la massarie sul seglâr.

«Ma lasse stâ di lavâ la massarie», j veve dit lui, «e parècjti invezi, par ch'o podînin cjatâ un bon puest in tal cjamp!».

«Un minût», j veve rispuindût jê.

E invezi di minûz a 'nd' ere passâz e a 'n' passave cetanc': che jê, dopo, 'e veve ben di lavâsi, di petenâsi, di piturâsi, di sielzi ce vistît di meti, ce scarpis di meti...

«E alore?», j diseve lui.

«Un moment», jê, «nol sarà mico fûc!».

«Al ven tart».

«Ma ce tart! Ào o no ào di vistîmi?».

E lui al veve talpinât pal curidôr sù e jù, bruntulant.

Curte. 'E jere finalmentri jessude de stanzie e a' jerin finalmentri partîz cu la machigne.

Ma la machigne a' vevin scugnût parchegjâle lontan dal cjamp parvie che mil altris a' vevin za incovâz i miôrs puesc', di mode ch'à jerin stâz obleâz a lâ a pît in tal cjamp, che lui, paralitic, tanc' pàs e tantis blestemis.

A' jerin jentrâz tal cjamp ch'al stave par finî il prin timp de partide. «'Acrament», al veve dit lui, «e al jere un mês ch'o spietavi!».

«Ma sta bon! Sta cujet une volte!», j diseve jê.

E lui: «Ce cujet... ce cujet...», al rugnave.

Fin che jê si volte viars un siorut ch'e veve ali dongje e j domande: «Siorut, par plasê, savarèssial dîmi a ce pont ch'e je la partide?».

«Zero a zero».

E jê alore, trionfant, al Carleto: «Viodût mo tù, tantis stòriis! E no tu âs piardût nuje!».

M.

CHERNOBYL

*Chernobyl,
vê pôre
dal àjar,
di un gote
di aghe,
di un nûl
ch'al passe,
di une fuèe
di salate.*

*Chernobyl:
vê pôre
dal nuje,
de jarbe,
dal avignê,
dal lat...
dal omp
che, pôr savint,
cul so savê
nûs cope.*

GIANNINO ANGELI

Machinis

Mê sâr Anemarie a sedis agn 'e jere propit une bieie frute: une cjavelade di bòcui colôr forment madûr, voglons di spiegîasi, une vite di balarine.

Un dopodimisdì là de Marie di Scjecât, cusine ma soiredut amïone, intant che insieme a' fasevin borsis di rêr cul spali denant dal balcon dal tinel, a' fevelavin di morôs e di matrimonis: «Jo», 'e disè l'Anemarie, «no mi maridi se il gno omp nol à almàncul tre machinis».

«Poben», dissàl Gjgj di Pole che cidin al scoltave sentât su la bancje di fûr, «cjólmi me, Anemarie: ò ài la machine dal caffè, chê di cusî e chê dal solfato».

P. S.

Il matrimoni al è tant pesant che, par podê puartâlu, tocje jêsi in doi.

CONSOLONS

*In cheste di di maj ch'o soi rivât
par trois che in uê da râr a' viódin pît,
culi che su chest nembri inculurît
di un milion di cucs 'o soi sentât,*

*'o gjolt cjalant atôr dut il creât
che tal seren resint al lûs e al rît,
e nie no sint, une peraule, un strît,
nancje di un frôs, che di àjar nol è flât.*

*M'impensi. Cetanc' agn sónin lâz vie
de volte che fin chi pe stesse strade
'o ài stât cu la Mariute, anime mê?*

*Precise la zornade, come uê;
seren il cîl, di cucs 'ne neveade,
e nô bessôi. E vê vinc' agn! E nie!*

M.

LA MOTO DI ALDO

Aldo Leon, di Migèe, subit dopo de ultime uere mondiâl al veve comprade une vecje moto, di seconde man, par divertiment. Ma dopo qualchi scampagnade cheste moto, invezì di divertîlu, 'e veve scomenzât a tormentâlu, ch'e stave plui lì dal mecànic che no a cjase sô.

Al sopuartà par un pôc, ma tal ultin, viodût che nol jere mût di mendâle, al pensà di meti in vendite chel boe di un imprest, e al metè fûr la vôs di chel so intendiment tant a Migèe che tai paîs dal contorno.

E une dì al capità a cjase sô un capelan di un paîs dal contorno cun chê di comprâ cheste moto, e al domandave di ce anade ch'e jere, e trop ch'e costave e se 'e lave ben.

Aldo al scoltà, e al taseve. Al cjalà a lunc il plevan. Tal ultin, che propri no si sintive di imbrojâlu, j disè: «Siôr capelan, che nol stedi a comprâ chest argagn che, se m'al compre, 'o soi sigûr ch'al impare a blestemâ ancje lui».

ALDO GALLAS

In Baviere

Il prin centro de Baviere che si cjate, lant indenant par un quatri cinc chilometri dopo vê passade la dogane di Salzburg, si clame Freilassing.

'O soi passât di chês bandis juste la dì de Madone d'Avost, par lâ a cjatâ gno cugnât Marino, ch'al vîf in chê zone ormai di agnorums e ch'al mi stave spietant tal pâis di Ainring, ch'al è propit dongje Frelassing, in cjase Pizzinger.

Stant che no cognossevi ben la strade, a Freilassing mi soi fermât in plazze par domandâ qualchi informazion: «Bitte», j dîs a di un ch'al sta passant in chel moment, «Ainrig?».

«Oh, Airing!», al mi dîs chel, «Links (a zampe) rechts (a gjestre) e geradeaus fünf kilometer (simpri dret par cinc chilometri)».

Lu ringrazi. J dîs «danke» par todesc. E biel ch'o stoi par inviâmi viars Ainring, secont chel che mi à dite, mi torne a fermâ, par vie ch'al veve viodude te targhe de machine la sigle di Udin: UD.

«Udine» mi dîs cun meravêe «Ah... Udine, gut, gut...ich immer sonne Lignano ('o ven simpri a cjapâ il soreli a Lignan). Lignano, gut, gut...». E vie indenant cussì. No sai s'al veve un pôc bevût, ma no mi lassave plui partî e jo, stant ch'al si faseve ancje scûr, 'o

vevi primure di lâ indenant, par vie che a Ainring mi stave apont spietant gno cugnât.

Alore: links (a zampe) rechts (a gjestre) e... gera-deaus... par cinc chilometri! 'O rivi a Ainring ch'al è juste sul imbrunî.

Ancje s'o jeri za stât une volte, sot lis fiestis di Naddâl di qualchi an indaûr, de cjase Pizzinger mi visavi e no mi visavi. Ma, lant indenant a nâs, cun tant di meravèe da part de femine e de frute, 'o rivi juste a fermâmi denant «haus» Pizzinger.

«Vanessa», j dîs ae frute, «Salte jù e va a sunâ il campanel, ch'o sin rivâz».

Ancje s'o jerin un pôc stracuz par vie dal viaz, la frute 'e salte fûr di colp de machine e 'e va a sunâ il campanel.

«Oh», al dîs gno cugnât, «'o stavi juste disint ae femine: chêi e' àn piardude la strade...».

Si bussìn, si din la man, 'o jentrin in cjase e, stant ch'o sin in Baviere, 'o parin jù di colp un biel bocâl di bire.

«Orpo, ce buine!», 'o dîs.

E gno cugnât: «Chesta 'e je la «Vieninger Pils» di Teisendorf: la miôr bire de Baviere!».

'O bêt la bire, la gusti, mi plâs, e 'o cjali fûr dal bancon de bande dal zardin e dal ort. In Baviere no tu capìssis mai indulà ch'al finîs l'ort e indulà ch'al scomenze il zardin, parvie che dapardut tu viodis simpri

ort e zardin, zardin e ort... Ancje s'al è za ormai scûr, te part risiarvade al zardin, 'o rivi a viodi un pâ di plantis che mi pâ di cognòssilis.

«Sì, sì...», al dîs gno cugnât, «a' son propit "piorutis" (gjâtui) puartadis sù dal Friûl». E al si met a ridi come un mat... E po al mi dîs «Sastu parcè ch'o rît».

«Parcè?», j domandi curiôs.

«Parceche quant che lis ài plantadis al mi stave cjalant un ch'al sta propit culì dongje e ch'al voleve savê il nom des plantis...».

«E tû?».

«E jo», al mi dîs, stant che no cognossevi il nom botànic des "piorutis", j ài dite che par todesc no sa-vevi cemût che si clamavin, ma che par latin si clàmin "piorutis"».

«E lui?».

«E lui, dut maravêat, al mi à rispuindût: "Ah, "piorutis!" Latino! Danke, danke, her Marino"».

EDDY BORTOLUSSI

LA MOSCJE E IL RAGN

*Une moscje 'e diseve: «De mê vite
no puès lagnâmi: 'o vîf senze fâ nie,
su dut 'o svoli e 'o supi dut subite.
Se il ragn nol fòs a olêmi te sô cite
'o disarès: "Grâziis Signôr", e vie».*

*Il ragn al barbotave: «Mi lementi
parvie des tantis vitis ch'o scuén fâ.
Al è di quant ch'o nàs ch'o mi tormenti:
lotâ, simpri lotâ...
Par chel al è un lavôr
par me chel di dîj grâziis al Signôr,
ancje s'o scuén zontâ, pe veretât,
tal ultin, che la moscje al à creât».*

TRILUSSA

(Traduzion di Meni)




June


S.S. Trinitât, 1583-1794


Ven. fraternitatis Sanctissime Trinitatis de Bertiulo.

VI

- 1 L S. Justin
- 2 M S. Marcelin
- 3 M S. Clotilde
- 4 J S. Quirin 
- 5 V S. Bonifazi
- 6 S S. Beltram, patriarcje di Aquilèe
- ✠ 7 D PENTECOSTIS

- 8 L S. Medart
- 9 M S. Efrem
- 10 M S. Diane
- 11 J SS. Feliz e Furtunât, mm. di Aquilèe 
- 12 V S. Nofrio
- 13 S S. Antoni di Padue
- ✠ 14 D SANTISSIME TRINITÂT

- 15 L S. Vit
- 16 M S. Aurelian
- 17 M SS. Ciriache e Moscje, mm. di Aquilèe
- 18 J S. Marine 
- 19 V SS. Gjervâs e Protâs
- 20 S S. Etoze
- ✠ 21 D CORPUS DOMINI

- 22 L S. Nicete, vescul di Aquilèe
- 23 M S. Lanfranc
- 24 M *Nativitât di San Zuan Batiste*
- 25 J S. Guliemo
- 26 V *Il cûr di Jesù* 
- 27 S S. Cîril di Alessandrie
- ✠ 28 D S. IRENEU

- 29 L SS. Pieri e Pauli
- 30 M SS. Protomârtars

IV

Jugn. Il vignâl al tocje di uardâlu
secont ch'a van disint i studiâz:
butâj solfato e sòlfar, e spedâlu;
e l'ort sestâlu, e viodi dai tomâz.

Po' al ven San Pieri, là ch'al riclamave
Tarcint, 'ne volte, mieze Furlanie;
dulà che la gran' sagre 'e sparagnave
colaz par duc', e po' il breâr, e vie!

M.

JUGN

Su Jugn nol sarès nuje ce dî. Si sa che par solit al è un brâf mês plen di bon timp e di formenz, cu la int di buine lune parvie ch'e àn di lâ in fèriis. Baste che nol capiti come tal '86 che, biel che dut al lave ben, i pulitics si son cjatâz a inmaneâ une crisi.

Co chê crisi no coventave, la int e' àn duc' pensât che i pulitics no àn nujaltri ce fâ; po e' àn pensât ancje che ce ch'al sarès gambiât cu la crisi, al varès podût interessâ dome che ai pulitics e ai partîz; e infin e' àn tornât a pensâ 'es fèriis, che la mîor robe 'e je chê di lâ fûr des crisis.

Al pararès dut finît lì, ancje parvie dal cjalt, che si è duc' flaps e ancje i pulitics par solit a' rimàndin di risolvi ancje i problems 'za rimandâz a quanch'al sarà un pôc di fresc.

Ma ce ch'al pâr nol è ce ch'al sarà. Passât il timp, co a' tornaran votazions, la int si visaran de crisi che no coventave, e a' laran a votâ dome che i zitadins plui brâfs. E chêi mancûl brâfs? Di' vueli che par chê vie l'Italie no torni a vê democraticamentri une ditature, senze nancje bisugne di gloreâ cun aquilis e galiardez!

L. C.

PURITÂT

La agne Mâlie 'e je muarte vedrane. Le à vude curte e monde, e 'e à stât pôs dîs tal jet prime di murî.

Quant che si è inmalade, il predi al è lâa a cjatâle, come ch'al lave a cjatâ duc' i malâz.

La agne, apene che lu à viodût sul antîl de puarte de cjamare, 'e je jevade sù in senton tal jet là ch'e jere e j berlà: «Fûr di ca, che fin cumò nol è mai jentrât omp te mê cjamare!».

ENEA DE COLLE

Ce biel cjanâ co la furtune 'e sune!

DIARI

*Alore al è stât dite che un doman
i francs a' vignaran
mudâz in forme tâl che i mil di uê
a' rivan a vê il valôr di un,
di cent chêi che al moment a' son cent mil,
di mil il milion.*

*Un tant, par ce reson?
Par sparagnâ chêi zeros che al moment
a' van sglonfant i numars un spavent,
dulà che, tal fâ cont, si si confont;
e instès par dâj al franc che nô 'o doprìn
chê dimension che j dà il Gjapon al jen,
il muc al marc, la Olande al so flurin,
la Svezie ae sô corone,
i Stâz Unîz al dòlar, ch'al parone!*

*Che il plan al ledi ben? ch'al torni just?
Pò stâj che tanc' di lôr a' vébin gust;
jo nò, par nie: parvie
che jo, cun chê riforme ch'o cjacari,
no podarai mai plui séi milionari.*

M.

3 di jugn dal '86

IL TODESC

Cui bombardamenz di Udin dal '43 'e jere stade sdrumade ancje la nestre cjase des bandis di San Sualt, e cussì 'o scugnìrin lâ a stâ, sfolâz, a Malborghet. La cjase nus 'e veve cjatade gno nono Pieri, ch'al lavora-ve su par là come uardean di une pizzule centrâl eletriche.

Gno pari si inzeugnave a fâ di dut par tirâle inde-nant: di elettricist, di setôr, di cjaradôr, di boscadôr, e si jere fat volê ben de int dal lûc. Ancje jo, frut sui quin-dis agn, mi jeri insedât vonde ben, e cui fruz dal paîs 'o lavi d'acordo: mi vevin insegnât a siâ, a lâ in mont, a lâ a foncs...

Cussì la vite nus jere avonde cujete e no si pensave masse a ce ch'al suzzedeva atôr pal mont, fin che, biel-planc, 'e rivà la fin de uere.

I todescs a' scjampàrin il 24 e 25 d'avrîl dal '45, e i aleâz a' rivàrin ai prins di maj.

Te setemane «blancje», i caposfamèis a' dezzidèrin di meti adun un comitât par mantignî l'ordin tal paîs e par difindilu di qualsisêi agression. Dit e fat duc' a' cjapàrin in consegne une sclope, si metèrin tal braz une fasse cun scrit C.L.N. parsôre e si dividèrin in dôs schîriis di siet vot di lôr. La prime schîrie 'e cjapà pusizion dapît dal paîs tra la strade e la boschete, la seconde in-

somp dal paîs, dongje un stali su la Pontebane.

Nissun dai doi grops nol veve masse ce fâ. Lis oris a' passavin tra une cjàcare e l'altre. Ogni tant al rivave qualchidun a puartâ lis ultimis gnovis.

Dispès 'e vignive fûr 'ne butilie e ognidun al clucave. Tal grop di gno pari, ch'al operave de bande di Pontebe, 'o jeri ancje jo, e il gno compit al jere chel di lâ a cjoli aghe, vin e spagnolez.

E une dì, 'tôr des dîs a buinore, al rive di corse te nestre postazion un frut su la mê etât, ch'o cognossevi, ch'al tache a berlâ sfladassant: «Lajù, là dal simitieri, al è un todesc ch'al ven indenant sun tun cjâr, e al sarà chi a momenz...».

Sintude une tâl, i caposfamèis si ritiràrin te boschete par discuti sul ce fâ. Dopo un pôc a' scomenzàrin a viodi tra i pins il todesc sul cjâr, po' a viòdilu simpri miôr man man che si vizinave: la gjachete disbotonade, senze barete, la barbe lungje, al veve un pît pojât sul tamon dal cjâr e chel altri a pendolon.

Il mus ch'al tirave il cjâr, sot il soreli, al jere piês dal paron: scarmulin, plen di polvar, cul pêl dret. al semeave ch'al stàs impins par scomesse.

Sul cjâr al jere slargjât a miez un telo di militâr, grîs. Ce jèrial sot vie di chel telo?

I amîs dal grop no savevin ce fâ. «Lu fermîno? E se sot dal telo al à la sclope? E s'al à la metrae? E s'al à bombis a man?».

Il todesc si vizinave simpri plui. Al jere rivât squasi a ret de boschete...

Gno pari a chel pont al cjapà la peraule: «Cun quatri fruz di mantignî jo no mi sint di cori rîscjos e di fâ imprudènziiis. Lu lassarès lâ dret pe sô strade».

«Juste», al disè un altri, e al zontà: «Tant plui che il capo al è cun chêi altris, e j tocje a lui di dezidi sul ce fâ. Lassìn che lu fèrmin lôr».

A' fòrin duc' d'acordo, e lu lassàrin passâ, senze fâsi viodi.

Quant che il todesc al rivà insomp dal paîs, ancje chêi di chel altri grop, viodinlu, si scuindèrin daûr dal stali par conseâsi, e pôc dopo il lôr capo al sentenzià: «Co lu àn lassât passâ chêi lajù, parcè varèssino di fermâlu nô? Se lu àn lassât passâ, a' varan vudis lis lôr resons, e nô no podìn lâ cuintri la lôr decision».

Cussì lu lassàrin passâ ancje lôr, e il todesc e il so mus a' rivàrin a quartâse fûr senze nissun fastidi.

LUCIANO VERONA

ISTÂT DE PLANURE

*Ce planure fofe
di vert, maron e 'zâl;
ce largjure tal clâr ch'al incèe,
ch'al trionfe l'istât!*

*Co dut al è tant cidîn,
nancje une fuée no si môf,
'es margaritis ur pâr
blancje la jarbe tanche lôr.*

*Ma a' rèstin dulintôr ca e là
i lens cul lôr vert ad alt,
chel vert cui siêi vôi a cjalâ
la pâs dal blanc lusôr sul plan d'istât.*

L. C.

Liturgje gnove

Un grop di anzians di Migèe a' son lâz, un istât, a Rimini, a passâ uns quindis dîs di vacanzis organizadis da l'aministrazion comunâl.

Tra chesc' a' jerin ancje Checo Zorat e la sô femine Tunine.

Checo, dopo la gnove liturgje de Messe decretade dal Consêi Vatican secont, nol veve mai stât in glesie; a Rimini, però, sburtât de femine e dai amîs, une domenie a buinore al dezidè di lâ a Messe.

Al lè a Messe. E il plevan ch'al diseve la Messe a un ciart pont, voltât viars i fedêi, al disè: «Scambiatevi un segno di pace».

Alore dongje di Checo 'e jere une turiste di Rome che, ubidint al invît dal plevan, j slungje la man a Checo par «scambiare» cun lui un segno di pâs.

Checo, che nol saveve nuje di chê gnove liturgje, crodint che la turiste di Rome 'e vês chê di fâ la sô cognossinze, j strenz la man e j dîs: «Piacere. Francesco Zoratti, di Medea».

A. G.

« TA L'OSELADA »

*Paussâ e insumiâsi
de iessi cui amîs,
zòvin «Kamikas» cul sclop,
ta l'oselada!...*

*E iodi la pernîs (bramada e mai ciapada!):
biela, a doi pàs, ulî... ch'a lu tentava
tai pras del «Bar-a-mur», (1)
a un pel da la vis'ciada.*

Da no cruodi, fantàs!

*E trâi 'na sbalinada ch'a la implomba
al siò dret; ve dîs: 'na canonada
ch'a dismòuf sul pî biel
i amîs de l'oselada,
la zent del culumièl,
i siors de la borgada (ancia i puarès
- che dopu a' l' àn contada).*

*E lui: «gran kamikas» (ma da panada,
no da pernîs!),*

*come intrunìt al sint, intorgolada,
bassa, sot-sot, 'na òus caramelada
ch'a dīs - par la pernīs, maraveada -
l'ultima baronada:*

*«E brau chel ciassadòur ch' a l' à smiràda:
al era a doi pàs, tai pras del «Bar-a-mur»,
a un pel da la vis'ciada,*

epura a l' à falàda!...».


RENATO APPI

(Furlan di Cordenons)

(1) - Località campestre in Comune di Cordenons.




Lui





S. Tomâs apuestul, 1673-1729


Veneranda Fraternità di S. Tomaso.

VII

- | | | | | |
|---|---|---|-----------------------|---|
| | 1 | M | S. Regine | |
| | 2 | J | S. Oton | |
| | 3 | V | S. Tomàs | |
| | 4 | S | S. Liodoro di Aquilèe |  |
| ✠ | 5 | D | S. FILUMENE | |
-

- | | | | | |
|---|----|---|-------------------------|---|
| | 6 | L | S. Marie Goretti | |
| | 7 | M | S. Claudio | |
| | 8 | M | S. Adrian | |
| | 9 | J | S. Veroniche | |
| | 10 | V | SS. Rufine e Seconde | |
| | 11 | S | S. Benedet |  |
| ✠ | 12 | D | SS. ERMÀCURE E FURTUNÂT | |
-

- | | | | | |
|---|----|---|---------------------------|---|
| | 13 | L | S. Rico | |
| | 14 | M | S. Camil | |
| | 15 | M | B. Buineventure | |
| | 16 | J | <i>Madone dal Carmelo</i> | |
| | 17 | V | S. Claudie |  |
| | 18 | S | S. Fidri | |
| ✠ | 19 | D | S. RINE | |
-

- | | | | | |
|---|----|---|-------------------|---|
| | 20 | L | S. Aurelio | |
| | 21 | M | S. Gjulie | |
| | 22 | M | S. Marie Madalene | |
| | 23 | J | S. Brigjde | |
| | 24 | V | S. Cristine | |
| | 25 | S | S. Jàcun |  |
| ✠ | 26 | D | S. ANE | |
-

- | | | | | |
|--|----|---|-------------|--|
| | 27 | L | S. Celestin | |
| | 28 | M | S. Serene | |
| | 29 | M | S. Marte | |
| | 30 | J | S. Gjjudite | |
| | 31 | V | S. Ignazi | |

IV

Luj. Un stofaz. Un cjalt ch'al mancje il flât.
E no si môf un frôs atôr atôr;
e sul stradon un cori disfrenât
di mucs al mâr; e la zitât un fôr.

O il nestri Sant Armàcure no viódial
roncs e campagnis trope sêt ch'e àn?
e i orz ce dûl ch'a fàsin? O no cródial
cul so burlaz di dânus une man?

M.

ANDREIS

Co tu passis pal unfiâr e tu rivis in paradîs, al ûl dî che tu sês a Andreis.

Plui di un al à vût dit che la Valceline 'e fâs pensâ al unfiâr de Comedie di Dante. Di Andreis, invezzit, si sa pôc. Ancje i furlans a' san pôc. 'E à fat ben, alore, la Societât Filologjche, a organizâ tal '86 la «Frae de Viarte» lassù... O àje fat mâl?

A sintî Fidri Tavan, ch'al è un poete pardabon originâl di chel paîs, busignarès che Andreis nissun lu tocjâs, nancje i furlans cul fevelâ la marilenghe: miôr ch'a rivin li dome i folesc' ch'a fevelin Talian, che, alore, al è mancûl pericul pe fevele di Andreis di misclizzâsi. In realtât, Andreis nol è dome che straordenari: al è unic e, propit parcè ch'al è unic, si capîs cemût ch'al puedi vê un poete come Tavan ch'al capîs di passâ par un omp strambât, ma che no j interesse, e anzit al jude i puars biâz «normâi», come nô, a fâsi chel judizi de sô strambarie. Ma nô (che no sin i salvans, che si sàlvin, ma i Umans) savarîno come lui «*Fevelâ cui prâz cui arbi e cul Signòur. Incrosâ steles e galassies. E in doi mil ans lûs, un segont, rivâ sul sorele ch'al è biel alt dut (e anc' un pôr biât a se comòuf denant la luna e li steles) e pici a s'éis 'na volta sola e a dura puoc: bisûn profitâ prima ch'i rive i «Umans» a decide che n'éis na roba seria*».

Fûr di man, in tune val dal unfiâr ch'e je 'za chê fûr di man, Andreis in realtât nol è un paîs ma il sium di un paîs. E duncje, culî ret, si pò dî che la puisie di Tavan 'e pò jéssi strambe dome che pe grafie (che mi soi permetût di tocjâ apene un tichinìn, juste par che la int 'e puedi lei) e pai «Umans» che no san fevelâ cui prâz cui arbui e cul Signôr parcech'a son aromai duc' strambîz de lôr Storie. Spessein, alore, co si è pizzui e ancjemò senze Storie, a gjoldi des bielezzis, che no son une robe serie...

A Andreis, tal sium di un paîs, chest al è pussibil. Ancje lis monz ch'al à intorsi a' son monz di siums. A' son scjalinadis di fâ par rivâ te plazzute e, co si cjamine pes sôs stradis, al pâr di no vê pês, di jéssi agnui. Alore no sin salvans, ma agnui! Si cjale lis sôs cjasis cui «dalz», ch'a son pujûi un parsore di chel altri sun dute la fazzade. Cui jerial su chei dalz? Cumò nol è nissun. Salacôr, quanche duc' i foresh' a' saran lâz vie, il paîs al tornarà in sè, e sui dalz a' compariran une int cu lis animis veris.

Chê int lì, ch'a san fevelâ cui prâz e cul Signôr, a' cjâlin lis monz e lis clâmin: Raut, Cuel taront, Cime dai furlans, Cime Manera, Prescudin, San Danêl de Mont... Cumò, che no mi viôt Tavan, 'o spieti ch'a rispûndin 'e clamade, biel che si delibèrin dai nûi ch'e àn intorsi a buinore co a' rivin foresh'.

L. C.

DÔS CJANTUTIS DE BUINORE

Jarbe jarbe lizerine
di buinore tal lusôr
al è il cîl ch'al ti cjarine
cun tun àjar plen di amôr

Se tu vegnis di buinore
là ch'e nas la lûs de dì,
tu às di viodi ch'al sflandore
paradîs, pinsîr, sintî.

L. C.

Une grande cjatade de nature 'e je stade chê di interrompi, par mût di dî, la vite cul sium. Cheste interuzion 'e je squasit un tornâ a séi faz gnûs, e il sveâsi come un tornâ a nassî. Difat ancje la zornade 'e à la sô zoventût. Cun di plui une grande varietât 'e nâs di chestis interuzions, ch'a fâsin di une vite sole come tantis vitis. E il distacâ une zornade di un'altre al è un grant rimiedi cuintri la monotonie de esistenzie. Ni cheste no si podeve diviarsificâl e mudâl di plui che metinle dongje in gran part squasi cul so contrari, ven a stâj cun tune spezie di muart.

GIACOMO LEOPARDI

MISURE

'Tôr lis tre di dopodimisdi, tal cjaldon di une zornade di luj, su la tresemane.

Un biât operari al stave piconant l'asfalt par sistemâ un tubo ch'al veve di rivâ tun tombin.

Cu la muse brusade dal soreli e i segnos di une vite sclagne, al sudave al sudave, e al blestemave.

Al passe un capelan, zòvin, che, sintint chel rosari, al dismonte de biciclete, al va dongje dal operari e j dîs: «Ma parcè blestemàiso in chê maniere?».

L'operari si volte, al viôt il predi e par un moment al sta fêr. Podopo al torne a piconâ cun plui fuarze mostrant al plevan che sot dal asfalt al veve cjatade une pierre che a ogni colp di picon 'e jevave un nûl di falivis.

«'O viôt 'o viôt», al diseve il plevan, «'o ài capît; ma ce covèntial blestemâ in chê forme?».

E l'operari, serio: «Reverendo, il minimo indispensàbil!».

R. B.

La malada

«A misdì, d'acordu?».

«Sì, sì, d'acordu, spasemat di cristian», 'a ghi à rispundut Santina, santa femina, sierant la puarta da la Fiat 600.

Santina e 'l son paron (ma 'a comandava ic, s'en-cia al no lu feve jodi e capî), a' vivevin a la periferia di Brusel e al sabo a' zevin in centro a fâ la spesa.

A misdì just Gigi al era denant de la butega, andu-là ch'a erin restas d'acordu di ciatassi, ma di Santina nencia sen. Gigi a' nol podeva stâ fer cu la machina, che uli al era pruibit, e cusì al à fat un ziru ator dal pallas; po a 'nd' à fas enciamò quatri zirus e po dopo al si à stufat. «Ch'a végni a piè». Al à fat dopo siet zirus, e al è zut a ciasa.

Santina 'a è tornada dongia a li doi, cul tramp. «Parsè i no sotu vignut a ciojmi?».

«I no ti ài ciatada nè a misdì nè a misdì e un quart», al ghi à rispundut Gigi, sustignut.

Po, situ Gigi e Situ Santina.

A la sera Gigi al tabajava e Santina situ.

'L di davour situ Santina e Gigi al tabajava.

Al lunis e al martis dopo, Santina, 'a no à viert bec.

«Santina, al è 'l miedi», a' j à fat Gigi, al miercui, viers li seis dopodimisdì, finit ch'al veva di lavorâ, di-

singhi al miedi di comodassi spetant la femine, par visitala.

«No soi malada; par cui 'l miedi?».

«Joitu s'a nol coventava 'l miedi per uariti, che jo i eri preocupat ch'i ti vessis perduda la favela».

OVIDIO COLUSSI

(Furlan di Cjasarse)

Duc' 'o vin vonde fuarze par sopuartâ i mâi di chêi altris.

FRANÇOIS DE LA ROCHEFOUCAULD

«MADE IN FRIÛL»

«Made in Friûl» di ca,
«Made in Friûl» di là.

Ta ogni sfuêi locâl,
no tu fâsis altri che cjatâ
ce che Bravo al invente
par presentâ mò ca e mò là,
in Italie e pal Mont,
in Province e in Regjon,
dentri e fûr,
ce ch'al fâs il Friûl...

Il «Made in Friûl»!

Passant par vie Morpurgo,
qualchi zornade fa,
'o ài viodût dismontâ,
di une machine blù,
Bravo cul autist...

«Crist!», mi soi dit
quant ch'o lu vevi
quasi denant di me,
«ce j dîsio jo cumò?

*E cemût fâsio a saludâ
chest Re e Sorestant
ch'al à inventât di colp
un gnûf e grant Friûl?».*

*«Bondi», j ài dit
cjatanmi a tû par tû.*

No savevi ce altri dî!

*Mi à dade une voglade,
di sot i granc' ocjâi,
e biel ch'al lave sù,
tal sîl di vie Morpurgo,
cu la bocje spalancade
e cul ridi di ogni dî
«Buongiorno, a lei»,
mi à dite a mè.*

E chest, a l'anime dal «Made...».

E. B.

Scais

Gjocondo Cecot, di Romans, simpri disponibil e bàbio tal zujâ di cjartis, qualchi mës indaûr nus à bandonâz.

Aldo Barnaba, paron de locande «Alla Posta», che dispès al zujave con lui, une dì m'al viôt bessôl e suturno, sentât tun cjanton dal locâl.

J voi dongje, lu saludi e j domandi: «E alore, Aldo, nuje partide uê?».

Senze nancje alzâ il cjâf mi dîs: «Vico, tu sâs ch'al è muart Gjocondo. No jerial miôr, cun dut il rispiet, ch'al fòs muart il Pape ch'a 'n' varessin fat un altri su-bite? Gjocondo, invezi, puaret, cui puèdial fânint un altri?».

V. B.

Altri al è un primitîf e altri al è un bàrbar. Il bàrbar al è za guast, il primitîf nol è ancjemò madûr.

GIACOMO LEOPARDI

IN FAMÈE

*In cjase, tal pensâ, al è un grant divari:
gno pari al è notât democristian,
al è impiegât scrivant in vatican
e no je sere che nol préi rosari.*

*Di nô tre fradis, Gjgj il plui anzian,
al è un fanàtic rivoluzionari,
jo invezi 'o soi monàrchic, al contrari
di Benamin ch'al è republican.*

*La sere 'o litighìn a bocje plene
parvie di chês dutrinis malandretis
che ognun la sô al ûl vêle a trionfâ.*

*Ma co la mame 'e dîs ch'e à pront di cene,
'tôr ràinis di lecâsi lis moschetis,
'o sin subit d'acordo sul ce fâ.*

TRILUSSA

(Traduzion di Meni)

UN VIN... DA MESSA SANTA

Par rinfuarsâ al punt, ta la passâda davant ciasa, Bepi al veva parlât cun Tita, bacanât de su par strada, par veir almancu un sinc, seis pai de cassia. Un afar de nuia par Tita, che, su par Santa Fosc'ia e ta la *Bassa del cuc*, al veva li' càssiis plantadis da agnorun, altis e fissis, come 'na boscheta.

Doi dis dopu, Bepi al se veva ciatât deis pai de cassia, luncs a misura e drets: a spac, butàs ta la passada. Puoc dopu al punt al era fat. Inclaudat a stangia lungia e rinfuarsât sui tres cun tocs de cassia dura, al punt al era un'òpara destinada a cundurâ tal timp fin che Diu comanda. E Bepi al era fier, parbiu! La passada 'a era ancia pì sicura adès, cui tres de cassia dura e quatri stangis lungis par sparangul. Al restava dome al cont da paiâ e parchel Bepi al se sintiva dreenti un scrùpul tal pensâ che Tita - bacanât de su par strada - a' lu spetava da un toc par parlâ de la Rosa - «che la Rosa 'a ziva maridada, se no altri par godi la metât de chê sô ciasa granda, senza dî de la dota e i bes de la ligitima!...»

In proposit, Bepi, a nol saveva se dî e al scrùpul, dreenti, al se feva pì grant, via-via che al timp al passava.

Epura bisugna paiâ!... Finalmentri, 'na dì, bel-belù, in bicicletà, al se veva decidut e, a siò mout, come ch'a

se usa ta li'ocasions de magra, Bepi, senza nuia mutignâ del descòrs de la Rosa, a se veva scusat pal gran retardu. Tita, allora, a' lu veva tirât dentra, vivaròus come sempri: - «Niancia da descòri, Bepi, se cognossen... No stâ a pensâ: a' son robis da puoc, robis da nuia, fùfignis!... (E Bepi, tra sé, adès al sperava tun condonu). Tant, te lu sas, se al è par mê sòur, al cont al è ormai fat. La ciasa 'a é a metât: uchì suoi iò e liec da chê altra banda: a miès del curidòur. La dota, la litigima, chel ch'al è. Tu te sas...» E al se veva fermât, spetandu da Bepi un motu de rispuosta.

«Veramentri, iò, par intant, eri vignùt par li càssiis». Bepi, stralunât, a nol veva altris parolis; timit, ma sclét, a nol voleva ciatâ scusis. E Tita, allora, come senza fâi casu, natural, a siò mout, e da bacàn, come sempri, al veva dita drèt: «Se al è par li' càssiis, a' sòn vint mili, Bepi...». (e Bepi, tra sé, intant ch'a iu contava, al feva al cont de deis, un cont ch' al resultava a doi mili par pal!) «Oh, sì», al continuava Tita, «a' son pai de càssia dura, pì durs del betòn», e al veva fraciât sul dî «dura» e «beton» par fâ capî che ancia Bepi nol era tant de pasta mola. Bisugnava capî.

«Su, sinta un moment. Al era tant che te spetavi... No par nuia, te sas...», e intant 'ch' al parlava al veva tuolt al bucal da la cardinsa e al impliniva un got da quart o forsi da miès litru.

«No, Tita, no. No pòus, cu l'ùlcera che me par-

ti...». «Chistu a' te la lens, l'ùlcera, Bepi. Te sintaràs e po' te às da cruodi, a nol à porcariis, l' ài apena travasat, ancia par la Rosa. Vin de anàda buna, forsi un puoc cargu de colour, ma no sbachetât: un vin da santa messa, par zent de buna bocia: un rosoliu!...». E intant ch' al parlava al impliniva l'altri got de un vin turgulìn, pì negri de l'ingiostri.

Bepi, cul malstâ, adès al suplicava: «No, no stai ben!... Ve prei, a disùn la mê úlcera 'a reclama!...».

Ma Tita, fermu, a' j veva slungiât al got: «No stòrriis, in ciasa mec, Bepi. Bèif, ch'a te passa!... Viva!».

Aromai rassegnat e propriu par finîla, siarandu i uoi, dut su 'na tirada al veva inglutit al vin de anàda buna cul stòmit ch' al urlava. Podopu, sveltu, de sora-man, al se veva netât i lavris e cul dî ch' al era tars e un «Ariòdisi in curt» al veva ciapât la puarta come 'na fussèta. Al era rivat tal curidour de miès, quant che davanti, minuda sui flancs, li' mans su la falda a timp par suiâlis e strenzi chec de Bepi, al se ciata la Rosa cun châ aria da vedrana, ch' a lu invida de là: «Vignît da la mê banda... su, comodavi... Dopu tant timp!...» «Rosa, no pòus!...» «Almancu a bevi un got. Un moment, nuia altri!...» «No pòus propriu! Suoi tars!... Ve ringrazi, de còur! E ài 'za bevut cun Tita!... Propriu no pòus!...» Bepi, pardabon, adès al scongiurava.

Ma la Rosa (furba, la vedrana) 'a lu veva inciantonât: «Se veit bevut da Tita, veit da bevi ancia da me:

nissuna preferenza! Un got? S'a èlu un got?...» - E intant ch'a lu invidava, 'a lu sburtava indavant, delunc al curidòur de la sô banda, versu la stansia, versu la tola e 'a viarzeva la cardinsa... La scansia granda... un gran bucal... un got da miès litru e 'na òus ch' a dise-va: «Al è apena travasat. Vin de anada buna, nuostri, de ciasa, a nol à porcariis. Forsi un puoc cargu, ma dome de colòur e no sbachetat: un vin da santa messa!...».


Bepi, al saveva: a nol era un striament. Bisugnava paiâ. Cussì, senza fâ motu, squasi ridendu, senza fâsi preâ e i uoi spalancàs, pal stòmit ch' al zemava, al veva inglutit al vin tuna sorsada. Po', calmu, a ciaf alt, ma senza ringrassiâ al era zut fòur, soflandu a la vedrana dome dos parolis: «Adio, Rosa!».

R. A.

(Furlan di Cordenons)




Apost





S. Roc, 1631-1717
Fraterna di S. Rocco Palma.


VIII

- 1 S S. Alfons
 2 D PERDON DI ASSISI 
-

- 3 L S. Lidie
 4 M S. Zuan Marie Vianney
 5 M *Madone de nêf*
 6 J *Trasfigurazion dal Signôr*
 7 V S. Domeni
 8 S S. Gaetan
 9 D S. ERMINIE 
-

- 10 L S. Lurinz
 11 M S. Clare
 12 M S. Macari
 13 J S. Puèlit
 14 V S. Fredo
 15 S MADONE D'AVOST
 16 D S. SCJËFIN DE ONGJARIE 
-

- 17 L S. Roc
 18 M S. Èline
 19 M S. Marian
 20 J SS. Leonzi e Carpòforo, mm. di Aquilèe
 21 V S. Piu X
 22 S *Marie Regjne*
 23 D S. ROSE DI LIME 
-

- 24 L S. Bartolomio
 25 M S. Parizie
 26 M S. Ermògin, m. di Aquilèe
 27 J S. Moniche
 28 V S. Agustin
 29 S S. Sabine
 30 D S. FELIZ 
-

- 31 L S. Aristide

Avost, lis fèriis vino di passâlis
sul savalon di Grau o di Lignan?
là che lis inz di no rivâ a contâlis?
Nò, fîs! Cirìn la cjase di un bacan!

Agroturìsim, fîs! Su pe riviere
te cjase di un bacan, o su pai cuêi!
E lì lis mans in man buinore e sere!
E pâs! E mangjâ ben e bevi miêi!

M.

CORMÓNS

Il non di Cormóns al è pluitost mistereôs, come chêi di Cormôr Caprive Vilès e parfin di Udin, che i studiôs a' confèssin di no podê dînus alc di sigûr in proposit. Ma cetant biel no ésal ch'a séin nons ancjemò mistereôs? E soiredut al è biel il misteri par Cormóns, païs furlan ma dongje de Sclavanîe, tra Udin e Gurizze, tra la storie dal Patriarcjât di Aquilèe e la Mont Quarine, un pôc salvàdie e unevore fantastiche, cu lis sôs vijotis pôc praticadis e lis sôs vistis stralusintis di vert inviàrs cuelinis e plagnis, a misdi e a soreli a mont.

Dut il mont, viodût di Cormóns, nol è chel che si lei sui gjornâi, ma chel che si pò insumiâsi se si è furlans di chêi che no àn mai dismenteât ce vert ch'al è cullì il vert tal soreli dopo di tante ploe.

Cormóns al è un païs gruessòt e cun qualche edifiz avonde impuartant, ma al è plui impuartant il fat che si rivilu par une strade ch'e je une plere che nus bêf cui siêi pôi cipressins e alore, dopo, si àmilu chel païs, che, dopo di chêi pôi, si viôt che, cu la Mont Quarine, al à la grande furtune di un dulintôr dut vert. Alore i siêi edifizis impuartanz a' devèntin plui impuartanz parvie de suaze, e la suaze 'e je cussì impuartante che dut il païs al trionfe, dentri, cu la glesie, lis plazzis, il monument di Massimilian, ch'al fâs crodi a tanc' di jéssi Cri-

stoforo Colombo, e l'atmosfera mitteleuropeane, e chel nobil vin blanc che dome i res dai vignâi a' san preseâ-lu ad implen co ur rive tes venis: che lôr a' san ce ch'al ûl dî chel àur e chel secont savôr di màndule ch'al rive dopo dal prin, di triscule.

Ve' mo! Si trate di un discors tra i omps e lis cjossis, che salacôr senze blancs come chêi di Cormóns al è impossibil. Ancje chest al fâs part dal misteri, come il non dal paîs, come il vert stralusint, come la Mont Quarine, pluitost sgjarnade, cu lis gleseutis e cun vignâi e zariesârs ch'a semèin salvadis e ch'a son, invezzit, sancîrs come il cîl.

L. C.

La glorie dai granc' omps 'e à di séi simpri confrontade cui miez ch'a son stâz doprâz par rivâle.

FRANÇOIS DE LA ROCHEFOUCAULD

DELIRI

*Sée benedete l'ore e la stagjon
e la zornade e il mès ch'o fói peât,
e di cheste zutizze incjadenât,
di chest amôr siarât in pareson.*

*Benedete la pene e l'aflizion
ch'o ten tal cûr e il dut ch'o ài suspirât,
e dut séal benedet ce che mi à dât
mutîf par ch'e nassès la mê passion.*

*Sée benedete chê che cui siêi vôi
in forme tâl mi à strapassât il cûr
che jo 'o ài tentât dibant di riparâmi.*

*Sée benedete chê ch'e à olût robâmi
duc' i miêi sens, e tant ju à burîz fûr
che, al pont, a' puèdin jéssi nome sôl.*

LORENZO MOSCHI

(Traduzion di Meni)

BEADE BENVIGNUDE BOJANE

'E je nassude a Cividât tal 1255 e 'e fo la tiarze di dîs fruz di un tal Corado di Vecellone clamât Bojan e di une Albertine di Butinins. So pari al jere une persone in grant, capo di une famêe facoltôse.

Di pizzule in sù 'e vè une grande venerazion pe Madone. 'E sô ore si fasè tiarziârie dal Òrdin di San Domeni. I tiarziâris di chest Òrdin no vivevin tai convenz ma tes lôr cjasis, dulà ch'a passavin lis lôr zornadis preant e cjastiant la lôr cjâr, e judant moralmentri e materealmentri chêi ch'a vevin bisugne.

La nestre Benvignude 'e fo straordenarie in chest cjamp. 'E preave fin a 700 patarnòstars e 1400 avemariis in dì, si meteve gotis di asê in tai vôi vie pe gnot par podê stâ sveade a preâ, si lambicave cun rutizzis, si strenzeve la vite cun cuardis che, dopo un pôc, j seavin la cjâr!

'E fo tant largje e gjenerôse di ajûz viars i puars che la int 'e scomenzà a venerâle di za in vite ch'e jere.

'E muri a Cividât il 30 di utubar dal 1292, a 37 agn di etât.

'E fo proclamade beade dal pape Clement XIII tal 1760.

CURIOSITÂT CJASTIADE

La cjase de none Marie 'e veve un còmut ch'al se-meave un trono.

Al jere un casselot avonde alt, cun tun tapon pesant ch'al siarave la buse e al faseve pensâ a chês bare-tis cul pompon ch'a usavin in chêi agn.

A mì, frute, mi plaseve une vøre chel «trono» sim-pri blanc come un taulîr di polente e ch'al nulive di va-rachine. Mi plaseve soiredut parceche mi obleave a fâ une gjnâstiche particulâr par montâ sù, e un biel salt par dismontâ quant ch'o lavi a siarvîmi. Tantis voltis 'o j lavi ancje se no vevi bisugne, par tignîmi in esercizi.

L'ambient là ch'al jere, stret e lunc, al jere riscla-rât di un balconut ch'al veve 'ne fereade invezi di un scûr. Daûr de gridelade si viodevin nome lis pontis dai àrbui dal zardin disot. E jo 'o volevi viodi alc di plui, magari qualchi frut, qualchi cjan... E, alore, dentri cul cjâf in tun di chei quadrêi de fereade!

E alore une dì su lis bancjutis rossis dilunc di un stradonzin di chel zardin 'o viôt, dopo di vê butât fûr il cjâf tune buse di chê fereade, ch'a jerin frutis ch'a zujavin cu la pipine. Jo 'o zigavi: «'O ven a zujâ ancje jo!». Mi rispuindevin cul fâmi bocjatis e a' ridevin e a' ridevin denant di chel cjâf ch'al fevelave e nol veve cuarp!

Tal ultin jo 'o dezzît di ritirâmi e di gjavâ fûr il cjâf da quadrel de fereade. 'O cîr di fâlu, ma il cjâf nol jesseve. Lu ziri di une bande, nuje; lu ziri di chê altre, nuje; lu tiri indaûr cun fuarze, nuje. Nol passave plui. Ma cemût, s'al jere passât prin? Lis orelis a' cjapavin simpri dentri tai fiârs dal quadrel.

Alore 'o ài tacât a vaî disperade e a clamâ ajût, e nissun nol vignive. 'O jeri restade lì come une pantia-nute tal tramai.

Finalmentri, quant che Diu al à olût, 'e je rivade la none Marie.

'E à viodût. 'E à capît. Mi à savonât lis orelis ben e no mâl e dopo, ziranmi un pôc ca e là il cjâf adasi adasi come par gjavâ une vere strete dal dêt, 'e à podût puartâmal di ca chel cjâf che prime al jere lât là di là come nuje, insiorât di une gnove esperienze.

LUCIA SCOZIERO

'E je int ch'a scomenzin a vivi quant ch'al è timp di murî; altris ch'a finissin di vivi prime di scomenzâ.

LUCIO ANNEO SENECA

IL STURNEL

*J cops duc' ben in rie
sul tet de cjase là ch'o soi a stâ,
di cent sturnêi passûz 'ne compagnie
m'ai móvin par niâ;
cussì, quant ch'al sglavine,
l'aghe de ploe che simpri 'e ûl vê il so troi
mi rive sul sufit e m'al riuine
de cjàmare ch'o stoi.*

*Jo alore a di un dal trop
ch'al jere a navigâ di scoreât
cun stecs e fueis e frôs tra cop e cop,
j ài dite, màrtars stât:
«O tù lassù disôre»,
j ài dit, «che tu lavoris a dispiet,
sâtu o no sâtu che par chê tô vøre
a mì mi plûf sul jet?».*

*Mi à rispuindût: «Vadì
che di chel trat 'o ài colpe jo, cumò!
Ma tù, chê ploe ch'e ven cussì e cussì,
t'e plóvio forsi jo?».*

M.

Patâtis

L'Elio, il Claudio e il Bruno a' bevevin nome un taj par ostarie, parceche duc' e' àn di vivi.

Alore une sere sul tart che lis ostarîis a' jerin za dutis siaradis a' pénsin di lâ in cjase de Celestine, mari di Bruno, par finî a la miôr la zornade.

A' tirin fûr un butilion de cantine e jù. Po' a' pénsin di mangjâ alc parsôre: paste sute, fretae...

Paste no'n' cjàtin. A' cjàtin nome tre ûs e uns quattri patatis tune sporte di fuéis di panole.

A' màngjn ûs e patatis, ancje se, par dî il vêr, lis patatis no vevin propi savôr di patatis.

Tal indoman la Celestine 'e à cirût dibant in te sporte lis patatis dai siêi tulipans.

E. D. C.

Tanc' di lôr a' son tant ingorz di fevelâ che no lassin dî nuje a chêi altris. E come qualchi volte 'o viodî tes àriis un polez a robâ un spi dal bec di un altri, cussì chêi li a' gjàvin i rasonamenz de bocje di chel che ju à scomenzâz.

GIOVANNI DELLA CASA

Ajûz

Al jere un operari sul ôr de strade cu la sô motorete ch'al cirive di impiâj il motôr. Al cjalcjave al cjalgjave il pedâl par impiâj il motôr, e il motôr nol cjapave; al tornave a cjalcjâ il pedâl, e il motôr nol cjapave inmò nò; al cjalcjave di gnûf il pedâl cun plui fuarze, e nuje: il motôr al dave qualchi tossude, al butave fûr une bugadine di fum neri e penz e nujaltri.

L'operari alore al tacà a blestemâ. «'Orco ca... 'orco là...», al diseve, «'acrament... 'orche sù... 'orche jù...».

Al passe un predi e lu sint ch'al risiave in chê forme. J va dongje e j dîs: «Ma parcè po, paron, blestemàiso in chê forme? Disêt un patarnòstar invezi! Domandàit un ajût al Signôr...».

E l'operari: «Ce ce patarnòstars! ce domandâ ajûz al Signôr! Sàial lui ch'e je miez'ore ch'o mi scani e ch'o sudi ch'o soi dut in brût?».

E il predi: «Provàit, provàit a dî: "Bon Signôr, fasêt che mi cjapi il motôr"!».

E l'operari: «Ce... ce...».

E il predi: «Provàit».

L'operari alore si drezzà sù e al disè: «Sì. Signôr, bon Signôr, fasêt che mi cjapi il motôr...», e j dè une

cjalcjade secje al pedâl dal inviament dal motôr; e il motôr al cjapà.

E il plevan, restât di stuc, braz a pendolon: «'Acrament, j à cjapât!».

U.

L'ambizion no je condanâbil, ni no si pò dij la porche a chel ambiziôs ch'al à chê di gloreâsi cun miez onesc' e onorêvui; anzi a' son chesc' ch'a rîvin a fâ robis grandis, e chel ch'al mancje di cheste vôle al è un frêt e un inclinât plui al ozi che no al operâ. L'ambizion di condanâ e di detestâ 'e je chê ch'e à come ûniche finalitât la grandezze, come che le àn par sòlit i sôrestanz; che, la volte che s'e propónin par idul, par rivâ a vê ce che ju mene a chê, a' fâsin dut un plan de cussiènzie, dal onôr, de umanitât e di ogni altre cjosse.

FRANCESCO GUICCIARDINI

FRUZZONS

La Nene di Ètore e la Costantine si cjàtin une di a buinore lì de fontane a Biliris, tal miez dal borc di San Jàcun, che j làvin tre voltis in di.

«Viva».

«Viva».

«Nuvitâz?».

«Tantis».

«Conte».

«No puès».

«Conte».

«No puès, che, s'o tachi, 'o starèssin chi fin usgnot».

M.

S'o vin vôle di cognossi il valôr just di un omp, cjalinlu dispuejât dal patrimoni, dai onôrs, des altris falsis aparènzis de furtune; cjalinlu ta l'anime par viodi se lui al è grant dal so, o s'al à une grandezze cjolte ad imprèstit.

LUCIO ANNEO SENECA

INGJANS

*Siore Mariute che cun tante art
tu ti pituris i cjavêi tiêi grîs,*

*tu rivarâs, pò stâj, a ingjanâ i vîs
cun chês tiês tintis, ma mai plui la muart.*

MARCO VALERIO MARZIALE

(Traduzion di Meni)



Aquerel di Meni Ucel

« MA ANCJE ORENT! »

Par fâ in mût che la frute 'e cjapi sù ben il furlan e si rindi cont ancje di chês ch'a son lis «varietâz» de nestre lenghe, 'o ài visât i nonos di San Vît dal Tiliment, Angjlin e Felizzite, e la none Gjilde di Palazzûl de Stele, di fevelâj simpri par furlan e cul lôr vêr lengaz.

E cussì, co la frute si cjate di une bande e si slapagne dute contente daprûf la vascie e la pompe dal curtîl, «Ah, se frescia ch'a è l'aga!» 'e dîs; opûr, co si cjate di chês altre bande, «None, âtu cjolte l'aghe?».

E se la none Gjilde no le à cjolte, 'e va jê cul bocallut di veri lusint in man a jemplâlu fintremai ae fontane, che si cjate subît fûr di cjase.

Al suzzêt dispès però che, stant che la frute no à ancjemò imparât ben il furlan e che, ca e là, j mancje ancjemò un freghenin di sigurezze tal fevelâlu, 'a s'imberdèi ogni tant di un alc.

«Cagnèris!» al disarès Meni Ucel. «L'impuartant al è che lu fevéli».

Si! Però, al suzzêt ancje chest. Vinars passât, dopo séi stade al marcjât di Palazzûl cun sô none Gjilde, indulà che chês j à comprât ancje un biel pâre di zocolutis rossis di len, cui pipinetuz blu parsore la fassute dal pît, la frute, cun sô mari e sô none, si è metude a sgjarfâ fûr di un vecjo armâr, e a contemplâlu cuintri la lûs

dal soreli, un scampulut di tele a colôrs che la none lu veve metût vie ancjmò sepi Diu di quant.

Ben, quanche la none j à dite ae frute che, se il scampulut j plaseve, j al varès dât par che si fasès un biel vistidut, chê, cence nancje rîndisi cont di ce che voleve dî, j à rispuindût di colp: «Orpo, none, al è biel sì. Ma ancje orent!».

E. B.

Gno barbe 'Tin mi diseve che la fieste plui bieie no je la Pasche ni il Nadâl: 'e je quant che si cope il purcit.

FRANCESCO MOSER



Setembar

Nativitât de Madone, 1792

La solennità della B.V. Miracolosa in Regolado di Costa di Sotto Aviano, si celebra l'8 settembre.

IX

- 1 M S. Gjdio
2 M S. Elpidi
3 J S. Grivôr il grant
4 V S. Rosalie
5 S S. Vitorin
6 D S. EVE



- 7 L S. Anastasi, m. di Aquilèe
8 M *Natività de Madone*
9 M S. Gjoachin
10 J S. Nicolò di Tolentin
11 V S. Proto
12 S *Il Non di Marie SS.*
13 D S. ZUAN GRISÒSTOMO



- 14 L *Esaltazion de Sante Crôs*
15 M *Madone Indolorade*
16 M S. Eufemie
17 J S. Robert
18 V S. Sofie
19 S S. Colombe
20 D S. EUSTACHI



- 21 L S. Mateo vanzelist
22 M S. Maurizi
23 M S. Lino I pape
24 J S. Pacjfic
25 V S. Firmin
26 S SS. Cosme e Damian
27 D VIZENZ DE PAULI



- 28 L S. Venceslau
29 M S. Michêl, Gabriel e Rafael
30 M S. Jaroni



Setembar. Si bandone la marine
par lâ in montagne a gjoldi, se si pò;
par lâ a Dimpez, a Sauris, a Culine,
dulà che l'àjar al è a fâ bon pro.

Se invezi no si pò, poben, alore
milante a' son lis sagris pai païs.
Si cjataràlu il mût di passâ l'ore
ce ca ce là in concuàrdie cui amîs.

M.

GRAU

'E je une grande furtune dal Friûl chê di vê Grau cu la plui bieles marine dal mont lì, dongje Aquilée.

I gradesans a' dîsin tu e me e no ti e mi come in dut il Venet, ma lôr a' son une int che sepi Diu dontri che ur è vignude la fevele, tratansi di un Venet cun tun sunôr furlan. E peraulis dibot compagnis dai furlans a'nd'ân avonde, ch'a dîsin, par esempi, *cricâ*, pal nassî de dî, *indola*, par indulà, *silisa* par sisile e vie indenant. Aquilée, che le ân juste lì daûr, si sa che une volte 'e jere dutun cul lôr mâr e il lôr sotèt, ma vuê si pò dî che lôr a' son alc di plui dai veniz e dai furlans, biel che i aquilejês vuê a' son dome che i furlans, compagn di chêi di Zarvignan, Flumisel o altris paîs. Al ven a jéssi che l'identitât dai gradesans 'e je plui marcade.

Al è che Aquilée 'e à, sì, une impuartanze storiche plui grande di chê di Grau, testimoneades des pieris antigonis che j son restadis, ma Grau, in plui des pieris e des glésiis antighis, al à lis cjasis, lis cjantis e lis stòriis. Cjasis ch'a compònin une musiche cui colôrs de lagune, cu lis naps maestosis e cu lis viuzzis e lis plazutis di piere, ch'a son un signâl dal stâ dongje de int, dibòt tune cjase uniche, dopo dal lavôr in lontananze sul mâr. E al è sul fons di cheste musiche dal paîs che s'inmaniin lis cjantis di glesie, che po' a' crèssin tal cîl

e si spândin tal àjar dal mâr par rivâ dal sigûr fin a Diu.

Il Campielo de la Scala al è un teatro vîf, e al ven il pinsîr che nancje Vignesie vuê no à plui, aromai, nuje che j puedi stâ a pâr. Parceche a Vignesie il popul nol fâs plui teatro e culî si: che culî al è un Giovanni Marchesan clamât Stiata ch'al conte stòriis, e la int lis rapresente vivinlis. L'ultime che si àle sintude in chel Campielo 'e je chê dal «Ultimo lion», e si trate di un biât idealist ch'al jere restât fedêl 'e Republiche di Vignesie dopo de vignude dai francês, calcolant che Vignesie 'e podès tornâ chê ch'e jere. No je mai tornade, e l'idealist, anzit, ch'al veve crodût a un ciart pont ch'e fos tornade cui siêi canons e i siêi armâz, al jere finît tal miez di un batibûi trement tra francês e inglês. Cussì, cun chesc' teatros ch'a còntin la vite di une int, il passât nol devente lafè presint: ma cussì, co il passât al si impie propit de vite di une int, tra chês cjasis là e chês napis e chês vôs te lûs marine, al devente eternitât.

L. C.

IL GARDILIN

*Puar gardilin ch'o ti ài culi devant
te scjpule a polsâ sul saltadôr,
opûr a bagnâ il bec tal bevadôr,
o a fâ chel alc di svol di tant in tant;*

*tal to cjavut ce pènsistu biel stant
o biel fasint chel nuje di lavôr?
e soiredut a front di chel sflandôr
di cîl culà difûr, dut un incjant?*

*Ti cjali. Ce tant lungje, crèature,
eterne, ch'e à di séiti la zornade
là che la sorte ti à metût a stâ!*

*E a stâ pe vite interie, fin ch'e dure,
fin che no rive l'ore destinade!
Ma tù, ce sâtu tù ch'e à di rivâ?*

M.

Bilirate

Mê sâr Franca di frutine no oleve savênt di stâ 'a Udin dulà ch'e stave la nestre famée. Se la menavin a Udin, si faseve vignî la fiere a quarante.

Mê mari e gno pari a' scugnivin tornâ a menâle sù a Biliris. Rivade ch'e jere insomp de ribe dal borc di Scjecât, no veve nancje une linie di fiere: 'e coreve tal braz di so nono e vie insieme dut il di pes bràidis.

La Franca no oleve nancje savênint di fevelâ talian: la sô lenghe 'e jere il furlan e vonde!

Une dì 'e mateave tune vascje di ziment tal borc di Pole. Al rive dongje un frutin che si ferme a cjâlâle a saltâ come un zupet te vascje di ziment.

«Cui îsal, Manda?», j domandà la frute ae femine di Gjovanin che j jere lì dongje.

«Al è Renato, il fi de Angjèliche. A' son rivâz di Savona», j rispuindè la Manda ae Franca; «Parcè no zùjstu cun lui?».

La Franca j disè al frut: «Monte te vascje, Renato». Chel la cjale e no si môf.

«Ven te vascje, Renato», 'e tornà a dij la Franca. Nuje.

«Franca, disial par talian», j disè la Manda.

E la Franca: «Renato, monte te vascje par talian».

P. S.

AVARIZIE

*Eco ce storie che mi è suzzedude.
Al passe Tin e Min no lu salude.*

*Jo che cun Min 'o soi 'o j dîs: «Cemût
che no tu j dâs a Tin nancje un salût?».*

*«No j al dôi gran», al dîs, «che s'o j al dèss
rispuindimi par fuarze al scugnarès;*

*e jo cussì 'o varès di jéssij agrât
dal flât che a gratis mi varès slungjât».*

M.

Tresemanis

Cìsio Murià, dopo tant studiât, al è jentrât di ruolo tes scuelis. E lì si son visâz che Cìsio al è barbot, ma barbot sul serio, tant che i paris dai fruz a' son lâz a protestâ dal diretôr, che i fruz no capissin un osti di ce ch'al dîs.

Il diretôr, par rindisi cont dibessôl de situazion, lu mande a clamâ. Cìsio al va, e prin che il diretôr j feveli, j dîs: «Però, come barboût, siôr diiretôr, no j see-mèial ch'o barboûti ben?».

*

Tin Pacjoc al jere lât là di Tite des âs a comprâ un pocje di mîl par curâ la sô tos. Al rive, e Rite j mostre dutis lis qualitâz di mîl in file tai vâs di veri: mîl di agaz, mîl di more, di saût, di cjastenâr e vie.

Tin Pacjoc, tirade fûr 'ne sedon ch'al veve te sachete, al scomenze a zerzâ, ma cun sedonadis che j jemplavin chê bocjate ch'al veve.

Tite des âs lu cjalave e al taseve, fin che 'e quarte o quinte sedonade nol podè stratignîsi: «Sint po Tin, s'o vès savude un tâl, ti varès pesât prime».

A. B.

SIARADE DE MONT

*Cui sestu tù, rivât su la siarade?
Sestu nassût sui crez?
E sastu 'za che un biel murî al vâl
pinanche il plui biel vivi?
Sint lis cjampanis gnovis!
Tu sês bielzà dulà ch'al è biel séi.*

*Siarade! Il timp te mont si sfante in cîl:
i crez, spietant lis stelis,
a' intivin ondis di univers lontans;
e là 'o sin nô cun chesc' lusôrs de tiare
verde e celeste, cui siêi flôrs, e il cûr,
batàli dai biêi siums fo resc' tal timp.*

L. C.

Mangjâ e bevi

Venturin, migeot, al lavorave tal cantîr di Monfalcon, e quant che intôr des siet di sere al rivave a cjase al cjatave pront un biel cit di mignestre cun dentri un toc di muset che sô mari j salvave dal gustâ di misdî.

Pe fan ch'al veve, al cjapave il cit e, senze doprâ la sedon, la mignestre la beveve tun flât, e il muset lu netave cun tune sole bocjade.

Une sere al rivà a cjase cun plui fan dal solit. Al cjapà sù cun dôs mans il cit de mignestre e jù, senze nancje tirâ flât.

Quant ch'al finì si visà che tal cit nol jere il muset, e j disè a sô mari: «Mari, e il muset dulà îsal?».

«Po te mignestre fi!», j rispuint la mari.

E lui: «Ûtu viodi ch'o lui ài bevût ancje chel, 'acrament!».

A. G.

Pan e gaban, si rive a lâ lontan.

MERLOT

Il risit di cheste uve al è rivât de Franze, dal Bordolês, e in uê al pò jéssi cunsiderât un dai plui impuartanz de nestre viticulture.

Vigorôs, fuart, di buine adatabilitât, al mene pulît tant in planure che in culine. Massime abàs vie des culinîs, là che la tiare 'e je rizilôse e frescje, nus dà un prodot preseât.

Il so vin, di colôr ros rubin, al à un bonodôr di frâmbue e di glâsigne. Une volte invecjât, il colôr j devente plui fin, «etereo», come che si dîs par talian, e il colôr al ven a quistâ riflès di modon.

Al à un savôr di jarbe, fresc, sut, cun tun font un pôc mâr.

Al à dai undis ai dodis grâz di àlcul, e al è indicât par cjârs lèssis, cjârs in ùmit di polam e cunin. Co al è vieli, ancje cui rosc' al va ben.

Si consêe di adatâ la butilie siarade ae temperadure ambientâl, sui disevot grâz, di viârzile e di siarvîle un'ore dopo.

Lis zonis tîpichis di produzion a' son: Iplis, Prepot, Buri, Cormons, Caprive, Marian e Fare dal Lusinz. E Feletan, là di Meni.

Toponomàstiche storiche

'O cognòs un savìnt di chenti che, in fat di toponomàstiche, al à la pretese di stâ a pet dal prof. Zuan Frau da l'Universitât di Udin. Jo, par gno cont, 'o soi cunvìnt che la toponomàstiche di chest savìnt no à nisun fundament sientific, come chê dal Frau, ma 'o scu-gni ameti ch'e à une sô logjche e, se si ûl, une sô atrative. E, cun di plui, storiche, stant almancul 'es teoriis dal gno savìnt.

«Par esempi», mi dîs, «sastu di dulà che al ven il non di Palazzôl?»: Palazzôl... propit cussì al è clamât là jù te Basse il paîs che si slargje dut adôr dal flun Stele, e no Palazzûl come ch'al dîs il Pirona.

«T'al dîs jo!», mi dîs il gno savìnt. E al zonte: «Al ven nuje mancul che di Atile».

Stant a lui, Atile, «il flagellum Dei», quanch'al uacave sù e jù pal Friûl a talpassâ i paîs e a foropâ i furlans, si fermà par un moment alì e j disè al so cjapitani in tun furlan stentât, che no lu veve ancjemò ben zupât dal dut: «Palàs... sôl!», intindínt che, di chel sîl, al vev di sdrumâ jù dut e lassâ sù dome un palaz. Atile al disè, però, palàs, cul «esse», che no j è mai vignût il «zete». E, duncje, Palassolo, par talian, Palassôl, par furlan, diventât, cui studiâz di dopo, Palazzolo, par talian, e Palazzûl, par furlan. Ma a chêi di Palazzûl ur va

une cane cul «esse» par vie che, come a Atile, no ur è mai vignût il «zete». E, duncje, Palassôl, lu disin a plene bocje. Storiche.

E Driolasse? Listès 'e à la so origine storiche propit in grât di Atile, «Driu... lasse!», j disè Atile al cja-pitani ch'o vin dite, e chel al lassà indaûr cjasis e int di chel lûc, al tirà vie dret, ma al lè, dopo, a sbrocâsi su Cjarmacis. E, duncje, Driolassa, par talian, Driu-lasse, par furlan!

«E il puînt de Delizie, ch'al ten unîz i furlans di de ca cun chêi di delà da l'aghe, parcè si clàmial mo propit de Delizie?».

Miôr no tentâ di intervignî, cul riscjo magari di contradîlu, cul nestri siôr savînt, ma lassâ che si sfoghi cu la sô toponomâstiche da lis fondis storichis. Atile ancje chî...? No. Napoleon cheste volte. Un altri ch'al lè sù e jù pal Friûl e par dut al lassa un ârbul dulà ch'al veve stât a parâsi, e un jet, dulà ch'al veve stât a polsâ, e qualchi strade che, bon par nô, si la dopre ancje al dì di uê, che lu ricuàrdin. Inutil vignî fûr cun stocs che no reònin ni cu la storie, ni cu la logjche, al contint il gno savînt. Su chel puînt, al conferme, Napoleon, cja-pât dai dolôrs di panze e di un bisugn urgent, si fermà, al calà jù i bregons, si scrofà e la molà, cussì tante e penze ch'al è un pecjât che no nus sédi restade di puartâ, magari... in qualchi museo a benefizi dai turisc'. Molade che la vè, Napoleon al jevà sù beât, disînt in tun

bon talian, che lu saveve ben: «Oh, che delizia! Oh, che delizia!».

E di chê j divignì il non furlan al puint da la Delizie!
E che Frau perdoni.

A. N.

Ogn'an la Filologjche 'e mande a duc' chêi che ur ven publicât qualchi test in prose o in puisie sul Strolc une copie dal librut a gratis, in ricognossiment dai lôrs contribûz. Ma no simpri 'e sa la direzion di duc' i autôrs di chesc' tesc' par podê inviâur il librut, di mût che qualchi volte 'e scuên domandâ sclarimenz a riuart a chel che nol pò no savê, ven a stâj al redatôr de publicazion.

E alore l'11 d'avrîl dal '86 al è suzedût che al redatôr dal Strolc pal '86 j è rivade une telefonade adulà che si diseve di no savê dutis lis direzions di chêi ch'a vevin vût publicât qualchi alc su chel Strolc, cussì si lu preave di dîlis.

A' mancjavin lis direzions di Lucio Anneo Seneca, di Marco Valerio Marziale, di Francesco Guicciardini, di Giacomo Leopardi...



Utubar

S. Francesc di Assisi, 1761-1762
Fraterna S. Francesco e Bernardino.

X

- 1 J Remigio
 - 2 V *Fieste dai Àgmui Custodis*
 - 3 S S. Taresie dal Bambin Jesù
 - ✠ 4 D S. FRANZESC DI ASSISI
-

- 5 L S. Tulie
 - 6 M S. Bruno
 - 7 M *Madone dal Rosari* ☺
 - 8 J S. Simeon
 - 9 V S. Dionís
 - 10 S S. Dènel
 - ✠ 11 D S. SANDRI
-

- 12 L S. Serafin
 - 13 M S. Doardo
 - 14 M S. Calist ☾
 - 15 J S. Taresie di Àvile
 - 16 V S. Margarite M.A.
 - 17 S S. Ignazi
 - ✠ 18 D S. LUCHE VANZELIST
-

- 19 L S. Laure
 - 20 M S. Irene
 - 21 M S. Òrsule
 - 22 J S. Luzio ☺
 - 23 V S. Boezio
 - 24 S S. Rafael
 - ✠ 25 D S. CRISPIN
-

- 26 L S. Folco
- 27 M S. Frumenzi
- 28 M SS. Simon e Gjude
- 29 J B. Benvignude Bojane ☾
- 30 V S. Massimo
- 31 S S. Quintin

Utubar. Une volte si sfuejave
te gran' cusine dal Ucel di Sot,
che dute la borgade si ingrumave
pe vøre, di stâ sù dute la gnot.

E intant de vøre, Nando, Zuan de Nene,
Zebec a intratignînus cu lis lôr,
e il nono Bric a fevelâ di Viene,
e lis pulzetis a cjantâ d'amôr.

M.

MANIÀ

L'impression 'e je di cjatâsi tune zitât mai viodude prime, fûr dal mont. E si che Manià al è ben cognossût, nomenât sui libris e su lis guidis turisticis, famôs pes fabrichis di curtis di ogni fate, cun esemplârs ch'a son a volte oparis di art. Di chel instès, lis largjuris des stradis e chê de grande plazze, cu la sioretât dai edifizis e l'antichitât di pieris e mûrs, pàrie cu la dignitât des costruzions modernis, a' esprimin, cuissà parcè, une malusérie, un dûl sutîl ta l'atmosfera e, infin, tal fons, une plèe fatalistiche di rassegnazion che Udin, par esempi, nol à. Sì, Udin al va propit nomenât a chest pont, parceche Manià, su la diestre dal Tiliment sot liz monz, cu lis stradis ch'a puàrtin a Fane, a Sequals, a Midun, e pes valadis mistereôsis di ventilà, al è, come Udin, un capolûc: il capolûc di un Friûl plui cidin e plui disgraziât.

Se jéssi furlan al olès dî, come che tanc' par secui e' àn vût intindût, partignî a une razze di puare int mâl destinade, Manià, che 'za cul clamâsi «Maniago» invezzit di «Maniaco» (daûr de forme gjenerâl furlane de talianizazion dai nons di paîs), al pant une piardite antighe, si pò dî ch'al è la vere capitâl dal Friûl. Ma 'o vin 'za dît che a Udin 'e je mancûl malusérie.

'E sô funzion di zitât furlane, Manià j dà seont ogni volte ch'al pò miôr ch'al pò. Cun dut ch'al pâr mut e

distacât dal so jéssi (la gnove Provincie sintije la furlanetât?), al à ancjemò il biel domo gotic, al à la biele plazze e lis bielis cjasis antighis, al à la storie furlane. Al pâr che là no séin plui i furlans, ma a' son. La lôr presinze si àle verificade tes occasions che il «genius loci» Aldo Tomè al à organizadis manifestazions di furlanetât. A' son simpri vignûz in tanc', di plui che no par solit di chealtre bande da l'aghe. Ma, finide la manifestazion, dopo che la int e' àn tant plausât i protagonisc', al semèe che un dûl grant al torni a cjapâ la int. Si disarès che, invezzi di lâ a cjase, a' vèssin duc' di jentrâ tal ospedâl.

Ce ch'al vâl par Maniâ, al vâl plui o mancul par dute la Diestre. Bisugne che un àjar fresc al passi lis aghis di ventilâ par che la int a' tòrnin a vê cûr di vivi sul lôr jéssi.

L. C.

LA BARZALETE

Zenco e Panzete tal fogolâr de Dosche, a Biliris, ch'a jerin ancje la Gjeme, la Mina, la Marta, Pisto, Zurche, Gogo, Bruno e jo.

Zenco e Panzete a' lavin contant lis lôr. A' conta-
vin chê di chê mame e di chel frut sul tram di Tarcint
par lâ a Udin; chê di chel bon paron di Zomeais ch'al
jere lâ di un uaridôr a Palme parvie des morôilis ch'al
veve; e vie vie...

Duc' ridi.

A di un pont Zenco j dîs a Panzete: «E cumò con-
te chê».

«Quale chê?», j dîs Panzete.

«Chê di chêi doi, omp e femine, che lui al jere apene
tornât de Gjarmànie...», al dîs Zenco.

Panzete al ingrispe il cerneli, al sminùcje la mo-
scje, al pense a po' j rispuint: «No m'e visi».

«Chê di chêi doi che nus diseve Rinaldo. Jê e lui...».

E Panzete: «Ah chê! Biele biele...», e jù ridi.

E Zenco: «Ben. Conte...».

Panzete al rideve e nol finive di ridi. «Biele,
uniche...».

«Còtile».

«No m'e visi», e ridi indenant.

«Cîr di visâti, ch'e merte», e al tache a ridi ancje

lui. «Chêi doi, omp e femine... che quant che Rinaldo nus 'e à contade...».

Ridons!

«Còntile tù», j dîs Panzete a Zenco.

«Nancje jo no m'e visi», e ridi, e ridi ancjemò.

Alore la Dosche, la Gjeme, la Mina, la Marta e duc' i altris dal fogolâr, denant de ridarole dai doi che no si bonavin, a' scomenzin: «E alore, fûr ch'e vegni! Di-strigàisi a contâle, ch'o podédin ridi ancje nô...».

«Ma se no s'e visin, cemût fasîno a contâle?».

«E alore 'cemût fasêso a ridi se no s'e visàis?».

«'O ridìn parceche quant che nus 'e à contade Rinaldo si visin di vê tant ridût che nus sclopave la panze. E ancje cumò no podìn fâ di màncul di ridi, pal riuart dal grant ridi di quant ch'o la vin sintude. Cussì 'o scugnîs cródinus su la peraule, e ridi in fiduzje ancje vualtris, e baste».

M.

OTOBRI

*Ta li sopis profumadis
di cjera nova
qualchi fuea zala
a plan 'a cola
sporciant chel spieli.
Un sciap di passaris
a sgàrfin
ta la morena secja.
Il cian nasant
a plan a plan
al riva sot li' passaris.
Al fuìs
chel scjap
nenfra i aunârs.
Davou 'na meda
in cjâf dal darât
il ciassadour al speta.*

O. C.

(Furlan di Cjasarse)

VERDUZ DI RAMÀNDUL

Al è un vin tipic dal Friûl, e une vøre preseât. Al ven fûr di une uve di verduz vendemade tart, in vignai che si cjàtin nome a Ramàndul, ai pîs de Bernàdie.

Al è zâl dorât di colôr, brilant, e al dà un odôr fuart come di pomis. Al à un savôr dut so, dolz cun tun font di tanin.

De juste fusion dai siêi componenz al jès fûr chel quilibrio che lu presente indicât a siarâ ogni gustâ par tant impegnâtif ch'al sedi.

Si à di bévilu sui 12 grâz, distaponant la butilie qualche minût denant di siarvîlu.

L'aghe passade no fâs cori il mulin.

Il bon ladrone

Si diseve ch'a jerin soldâz che no jerin rivâz a scjam-pâ dilà de Plâf la volte che i mucs a' vevin rot sù a Cjaurê e inondât il Friûl, e che si jerin rintanâz su pal Cjampeon o tai boscs tra Sante Marie Madalene e Stele par no séi cjapâz presonîrs.

A' vevin vivût cun ce che i biliroz e i magnaloz ur vevin puartât ogni tant a dute gnot che no ju viodèssin i mucs ch'a jerin di stazion in paîs, o cun ce che lôr stès a' jerin vignûz a domandâ, simpri di gnot, su la parte des ultimis cjasis dai paîs viars i boscs.

La int ju vevin judâz bulintîr, cun dut che la vès-sin curte ancje lôr, fin ae fin de uere; ma dopo, a uere finide, quant che tanc' di chêi puars biadaz no lassavin di domandâ indenant, à scomenzàrin a no viódiju plui bulintîr. Ur disevin : «La vin curte ancje nô, no podin contentâus. 'O podarèssis lâ a cjase uestre, o lâ a vôre! Cumò ch'e je firmade la pâs, parcè no tornàiso tai uestris paîs?».

Qualchidun al jere partît, ma tanc' no vevin lassadis lis lôr lobeatis in mont, ni no vevin dismetût di lâ a nîz in tai boscs e di tindi par cjapâ ucêi e jèurs; sore-dut no vevin dismetût di insisti che i paisans ur slungjassin inmò qualchi bâr di polente, qualchi fetute di argjel, doi fasûi, quatri patatis come ch'a vevin fat prin;

e la volte ch'a vevin viodût ch'al jere dibant...

Jèrial parvie di chel ch'a vevin tacât a sparî gjalinis dai gjalinârs e cunins des cuninâriis dal paîs? e che tanc' orz a' vignivin netâz? Jèrino lôr, chêi sbandâz, i responsàbii di un tant, ufindûz dal tratament ch'a vevin scomenzât a sparagnâur i paisans?

In chel timp al funzionave adimplen il stabiliment de spelae di Bulfons, adulà ch'a lavin a vøre un mijâr di frutatis di Bulfons, di Tarcint e dai paîs dulintôr.

A' lavin a vøre a Bulfons di sin di Segnà, di Cuelalt, di Magnan, di Biliris, di Buériis, un pocjs in biciclete, la gran' part a pît, puartansi daûr la sportute cul gamelin de mignestre, un bine di pan, une scae di formadi, un miluz. Partî a buinore e tornâ a cjase la sere. A straoris, chês ch'a stavin a Magnan, a Cuelalt, a Biliris, a Buériis.

A' uadagnavin chel alc e ogni quindis dîs a' puar-tavin a cjase la quindisine.

Ma cui jèrino chêi che, saltant fûr di une cise, a' vevin tacât a fermâ qualchidune di chês frutatis ch'a vevin platade la lôr biele buste de quindisine tal sen la volte ch'a tornavin par sot il Ròcul a Biliris biel lant a Magnan, o pai Cujestris biel lant a Cuelalt, o par la-jù de Casote biel lant a Buériis, la sere tart, che nol passave nissun fûr di lôr? A fermânt qualchidune saltant fûr su la strade cun tun fazolet su la muse a olê vê la buste de quindisine? Jèrino simpri lôr? Simpri chêi che

no vignivin plui judâz a sostentâsi dai paisans? chêi sbandâz che no vevin olût o podût tornâ a cjase lôr cun dut ch'e jere finide la uere? che no vevin lassât di stâ tai lôrs landris in mont?

Simpri chêi.

Par solit a' fermavin lis frutatis ch'a vignivin a pît. Ur domandavin: «Vêso tirade la pae?».

«Sì... sì...», a' rispuindevin spauridis.

«E a di cui la puartâiso?».

«Al pupà».

«Al pupà j 'n' baste mieze», a' disevin. «Chê altre mieze 'e je mê».

No jerin nancje trisc' lôr, puars frutaz che la uere ju veve sforeâz. A' disevin: «Nus displâs, ma 'o vin ben dirit di vivi ancje nô!».

Une sere, sul tart, un di chesc' al veve fermade une creature sot Pràmpar e j veve domandât: «Tù la buste le âtu?».

«Sì, le ài».

«Poben, dâme a mì», j veve dite. E la frute j 'e veve dade, vaint.

«Vêvistu di puartâje a to pari?», j veve domandât chel.

«Sì».

«Dulà stâtu?».

«A Magnan, tal borc dai Cignins, al cunfin cun Dartigne».

«E tu vadis ogni dì a pît a Bulfons?».

«Sì».

«E parcè no in biciclete?».

«Parceche la biciclete no le ài».

«Poben», j dîs il brigant biel tornan'j la buste, «cheste buste t'e torni a pat che tu j 'e déis a to pari, e che to pari la meti vie cun chês che tu tirarâs passe chi fin al pont di rivâ a comprâti 'ne bciclete: che nol è just che tu vebis di cjaminâ tre oris in dì tra buinore e sere par lâ a vøre a Bulfons».

Bontât dai briganz jessûz fûr da l'invasion dal Friûl de bande dai mucs ch'a vevinz rot sù a Cjaurêt!

M.

Bevi e no spandi, cjossolâ e no pandi.



Registo delle Messe, che si celebrano in suffragio dell' anime
de' Confessati, e Benefattori dell'anni della Scuola di S. Berardo.

Novembar



Memorie dei Defonz, 1764

Fraterna di S. Barbera (de' Bombardieri), Palma.

XI



1 D I SANZ

2 L *Memorie dai Defonz*

3 M S. Ubert

4 M S. Carli

5 J S. Zacarie

6 V S. Lenart

7 S S. Ernest



8 D S. GOFRÊT

9 L S. Oreste

10 M S. Leon il grant

11 M S. Martin

12 J S. Renato

13 V S. Dalmazi

14 S S. Venerande



15 D S. ALBERT IL GRANT

16 L S. Otmâr

17 M S. Lisabete de Ongjarie

18 M S. Grazian

19 J S. Matilde

20 V S. Tavio

21 S *Presentazion di Marie al templi*



22 D CRIST RE

23 L S. Clement

24 M S. Grisògono, vèscul di Aquilèe

25 M S. Catarine di Alessandrie

26 J S. Delfine

27 V S. Valerian, vèscul di Aquilèe

28 S SS. Màrtars di Aquilèe



29 D S. LIVIE

30 L S. Andrèe

Novembar. La fumate dut 'e plate
il doi dal mês, la dì che ai puars mancjâz,
tal simitieri là che si si cjate,
si ur dîs che no ju vin dismenteâz.

Po' il cîl al torne biel co si presente
l'istât di San Martin, che dut al rît.
Al dure pôc, ma chel che si contente
nol pò no consolâlu fin dapît.

M.

SAN CANZIAN

Ad Aquas Gradatas...

Canzi, Canzian e Canzianile, 'o savìn ch'a son tre martars cristians di cheste nestre tiare. 'O savìn ancje che tal nestri timp, che la int no je religjôse come une volte, chêi tre nons lì, se un nol à il balìn de storie fur-lane, no interèssin gran. No interèssin tant nancje chêi di altris sanz dal lunari, che anzit a tanc' ur interesse dome di meti ai fruz nons inglês. Cun dut chest, le nestre Bisiacarie, a un dîs chilometri di Aquilèe, tune tiare dute riade di aghis, in tune lûs marine, al è il paîs di San Canzian.


A' còntin lis stòriis che tun secul lontanon Canzi, Canzian e Canzianile, scjampâz di Aquilèe ch'a jerin perseguitâz, a' fòrin cjapâz no tant lontan e marturizâz ad *Aquas Gradatas*. Cumò San Canzian al è un paîs cun tune glesie, un tôr e cjasis e stradis, come tanc' altris paîs, ma al à un cidinôr dut so, lusorôs. Te plazze, ch'e je grande, la glesie 'e je tal miez cun pieris e sarcò-fagos e ciprès, ma chel cidinôr ch'e à dulintôr nol è di zimitieri: al è di passât e di misteri.

Ad Aquas Gradatas... A' vegin sù simpri chestis peraulis, cjatadis tun librutùt di M. Mirabella Roberti e S. Tavano che si pò vêlu lì, in glesie, e che nus conte ancje di altris martars e di altris pieris ch'a son lì atôr,

come chês di Crisogono e di Proto. Cetant lontans chesc' nons e chêi timps!

Culî 'e je une pâs grandiôse, ch'al pâr che nissun nol feveli. Ma il mâr al è dongje cun dut che culî al pâr che nol existi e ch'e sêi dome la sô lûs. Ce che no si capîs, culî, al è ce ch'al è plui biel. Si à il sens di jéssi 'za stâz in chest lûc, oben di jéssi rivâz la prime volte, ma di cjatâsi tun altri timp, salacôr propit sul moment che i tre martars, passât il piês, a' jentravin tal miôr, lant cun Diu. Diu! Un moment vivût di lôr, ma sintût, di lontan, anje di nô, in chest paîs fûr di man de nestre Bisiacarie, tal an 1986.

L. C.



SANTE CATARINE DI ALESSANDRIE

Di Santis Catarinis a 'nd' è dîs. Chê ch'e cole il di 25 novembar 'e je di Alessandrie di Egjt, e 'e je chê che si fâsij fieste a Udin il 25 di novembar apont.

'E je une màrtare ch'e à vivût tal quart secul d.C. e che l'imperatôr Massenzio le à fate copâ.

Secont ch'e dîs la liende, chest imperatôr, biel passant pe zitât di Alessandrie di Egjt, al organizà un sacrifici in onôr dai siêi Dîus e a chel fin al fasè copâ ben 130 tàurs, e al ordenà che duc', daûr il so esempli, a' sacrificassin instès: i siôrs un tàur e i puars un ucel.

E ve' che a di un pont 'e vignì indenant une principesse, bielisime, Catarine, che duc' reste tal viòdile. Ancje l'imperatôr al reste. E Catarine j berle pai mazzalìzis ch'al faseve fâ par onorâ chêi siêi Dîus fals e bausârs. Si bat cun tant traspuart e calôr al proposit che l'imperatôr si innamorè di jê fin al pont di ufrîj la corone imperiâl, cun dut ch'al fòs za maridât e che j fòs dongje la femine.

La Catarine si indigne e j berle indenant, in forme che l'imperatôr la fâs meti in preson, condananle a murî di fan.

Ma Catarine no mûr, che un colomp al ven a nudrîle.

L'imperatôr alore, dopo di vêj parferît di gnûf di sposâle, e di vê vude une gnove ripulse, al dà òrdin di fruzzâle, di sbregâle, metinle tune machigne besteole cun aruedis plenis di sgrifs, di menâlis 'toratôr cul fin apont di fruzzâle.

Ma i sgrifs no rivin a sbregâ la cjâr dilicade de principesse, tant che la int ch'a viodevin a' disevin: «Il Diu dai cristians al è vêr».

A di un tant l'imperatôr s'inrabie inmò di plui e la fâs puartâ fûr des puartis de zitât cun chê di fâj tajâ il cjâf. E biel lant jê 'e

preave par duc', omps e feminis, siôrs e puars, sans e malâz, bèstiis e dut, compagnade squasi in trionf di dut il pòpul.

Tajât che j àn il biel cjâf «luminôs plui dal soreli e plui pulît de lune» i Âgnui a' dismòntin dal cîl a cjoli il so cuarp par traspuartâlu sul Sinai, là che podopo j è stât dedicât un convent.

Nô 'o murin ogni dì; ogni dì nus cjôl une part de nestre esistenza, e vie vie che nô 'o cressin, si scurte la nestre vite. 'O vin piardude la infanzie, podopo l'adolessènzia, dut il timp ch'al è passât fin a uê al è piardût: la stesse zornade di uê la dividin cu la muart. Nol è l'ultin got ch'al disvuede la clessidre, ma duc' chêi ch'a son colâz prin; cussì l'ultime nestre ore no fâs la muart, la finis. A chel pont nô 'o rivin al trauart, ma 'o cjaminìn ch'al è un piez.

LUCIO ANNEO SENECA

Une ridarole fûr di puest

Al è cjalt e, come aromai simpri in Friûl, al è rivât dut tun colp. Ma une volte jèrie cussì? A mi mi pâr che quant ch'e lave vie dai cuviarz la ultime nêf de zitât, i morôs dal Cormôr a' jerin za pronz. Al bastave che l'inviâr al dês il plui pizzul segno di strachetât par ch'a vignissin fûr a plotons. Si varès podût falâ di zornadis, di une setemane, va, ma sù par jù 'tôr il 21 di marz 'e vignive simpri, stait sigûrs, e al jere come se si vês spietât qualchidun in stazion, treno tâl, binari tâl. Al jere un aveniment che propit si lu spietave, e 'o dîs il vêr, ancje se in uê qualchidun mi rît e mi compatis, che in chel timp 'o provavi une emozion propi grande. No mi vergogni par nuje. Anzi, 'o zontarai che nome s'o sintivi a dî che un al veve mâl di dinc' in chel timp, mi displaseve inmensamentri. Mi pareve dal impossibil che si podès vê mâl quant che dut al scomenzave a stâ miôr.

I muarz, po! Ma cemût, 'o pensavi, cemût si puèdial murî se finalmentri si pò lâ vie senze capot, e se ancje dentrivie si à gjavât fûr alc di pesant? Il soreli gnûf, il cîl plen di vitt-vitt, i balcon viarz, magari ancje lis scarpis di screâ; e dut chest parsôre de tiare, e nô lâ sot?

Eco un stâ mâl che no ài mai podût dismenteâ, e se in chêi dîs mi capitave di viodi un furnerâl (e magari

cussì nò al suzzedeve dispès), mi avilivi che mai. Cè tant d'ûl che mi faseve il puar muart cjalant il soreli ch'al lusive su lis manîlis e i càncars d'aur e d'arint de carrozze e sui penacs dai cjavai! Ce razze di gjte!

Epûr une volte, a proposit di chest, 'o faséi une part ch'e semée un cuintrisens cun ce ch'o ài contât. Al jere un timp adulà che nô 'o làvin dispès a viodi i muarz. Te cjàmare mortuàrie dal Ospedâl, ch'e jere squasit sul àngul tra la vie Ospedâl e vie Crispi, no sai s'o la vês presint, 'o sarin lâz plui di cent voltis a benedîju prime che ju siaràssin. I parinc' nus cjalavin. Par sòlit, si viodèbe benissin che no capivin cui ch'o podevin séi; qualchidun al fermave ancje di vaî. In qualchi câs, cirint di indivinâ tal nestri gjest un at di pietât cristiane ch'e varès vût di vignî nome di une buine educazion, a' fasevin viodi di complasêsi dal nestri pinsîr. Par nô 'e jere une grande sudisfazion, cun dut che si lave palpant ogni tant tes sachetis il pachetut des figurinis dai artisc' dal cine, forsi pensant che nus mancjave chê dal «feroce Saladino» di chê volte ch'a jerin Ramon Novarro e Rodolfo Valentino.

Une di 'o capitai lì cun chel che uê al è il professôr Rino Borghello, che cumò 'o pensi che no j displasarà cheste publiche amende ch'o fâs ancje par lui par une

cjosse mâl fate di ducjdoi. Duncje 'o jentràrin. Un muart di campagne, si viodèvilu a colp. Uns quatri o cinc feminis cui fazzûi neris sul cjâf, uns quatri o cinc omps, e il muart in tal miez, ancjemò viart, cun moschetons grîs e cjavêi grîs instès, senze golarine, vistît cun tun vistît neri a riutis claris, di pano ordenari e dûr, scarpis altis cul pontâl taront. Palidissin.

Come ch'o fasevin di sòlit, si fermàrin dapît de case, si fasèrin il segno de sante crôs, lu benedìrin, ma quant ch'o fòrin par fâ dietrofront, nus rivà la ridarde. Taponansi la muse, inclaudâz là ch'o jerin come se nus vès cjapât 'ne parâlise, 'o scomenzàrin a scjassâsi di cunvuls, ch'o soi sigûr ch'al pareve che si vaìs. Jo 'o mi rindevi cont dal sacrilegjo, ma ce podèvio fâ? 'O cjalavi fûr pes frissuris dai dêz la maravèe tai vôi di chê puare int che no nus veve mai viodûz e che al pont nus viodeve a vaî in chê forme. No mi movevi, ni no lu varès forsi nancje podût, e 'o spietavi, dut sudât, ch'e passàs; ma apene che i nestris comedons si tocjavin o apene che il pavement al dave un cric, la ridarole 'e tornave propri quant che si sperave ch'e stès par finî.

A un pont, par daûr, 'o sintìrin une manone a pojàsi su lis spalis di ducjdoi, e une vôs di omp tra i nestris cjâs: «Coragjo frutaz, il nono al è lât in paradîs».

'O scugnirin lâ daûr dal furnerâl, simpri cun chel omp in tal miez che nus tignive lis mans su lis spalis e che nus confuartave, che nol lassave di confuartânus: «Sù sù, coragjo», e nome te glesie di san Franzesc, che in chês volte a' puartavin alî i muarz dal Ospedâl, spietât e cjatât il moment just, 'o rivàrin a tovâse al «Dies irae» cu la pâlîde complizzitât des cjandelis.

Brute azion.

RENZO VALENTE

(Traduzion di Meni)

Massimin, imperatôr di Rome, nassût tun paîs là che uê si cjate la Bulgarie, fi di contadins, al jere alt «otto piedi e sei dita», ven a stâj doi metros e quarantesîs centîmetros. Al beveve une medie di vinc' litros di vin in dì e al mangjave dai dodis ai quindis kilos di cjâr in dì. In vite sô nol à mai zercjadis verduris. Nomenât imperatôr dai soldâz ch'al comandave tal 235 d.C., al è stât copât, simpri dai siêi soldâz, tal 238 d.C., intant ch'al stave cirint di somerzi Aquilêe.

Scriba Alme Aeterni Nati, Aeterniq³ Parentis,
Numine propitio nostri precor Aspice Coetum.



Dicembar

S. Zuan vanzelist

Collegio Notarile di Udine July Brunaleschi opus 1578. .

XII

- 1 M S. Eligio
- 2 M S. Cromazi, vèscol di Aquilèe
- 3 J S. Franzesc Saverio
- 4 V S. Barbure
- 5 S S. Ade
- 6 D S. NICOLE DI BARI



- 7 L S. Ambrôs
- 8 M MADONE DI DICEMBAR
- 9 M S. Siro
- 10 J *Madone di Lorêt*



- 11 V S. Damâs
- 12 S S. Malie
- 13 D S. LUZIE



- 14 L S. Žuan de Crôs
- 15 M S. Silvie
- 16 M S. Delaide
- 17 J S. Olimpie
- 18 V S. Grazian
- 19 S S. Dario
- 20 D S. LIBERÂT



- 21 L S. Pieri Canisio
- 22 M S. Franzescje Cabrini
- 23 M S. Vitorie
- 24 J S. Adele
- 25 V NADÂL DI NESTRI SIGNÔR
- 26 S S. SCJËFIN
- 27 D S. ZUAN APUËSTUL E VANZELIST



- 28 L SS. Inozenz
- 29 M S. Davide
- 30 M S. Gjenio
- 31 J S. Silviestri

Dicembar. Sante Luzie no rivave
come cumò in chê volte, cul regâl:
al jere il Diu Bambin che la jemplave
la cjalze, alore, aprûf dal cjavedâl.

E in glorie il dì de fieste pe pacjade
zovins e viêi e fruz in tal mezzât!
E tripis, e muset cu la bruade!
E pâs ai omps di buine volontât!

M.

SEQUALS

Vico di Cec (Lodovico Zanini), benemerit par tantis iniziativis furlanis, agnoruns indaûr al à vût fatis unevore di corsis in biciclete fin a Sequals par implantâ une scuele par mosaicjse'.

No si sa par ce resons chê nol è rivât in chê volte a realizâ la sô idêe, che daspò 'e je invezzit diventade realtât a Spilimberc. Il fat impuartant al è che Sequals al à la tradizion dal mosaic e di Primo Carnera, tant fuart e tant debul parvie de sô bontât.

Vê la tradizion dal mosaic nol ûl dî vê vude e vê ancjemò tante int pratiche di un mistîr e che magari e' àn fat furtune in Americhe cu lis «Mosaic and Terrazzo Companies»: al ûl dî ancje vê inlidrisât in qualchi misure un sens di bielezze e di art.

Co la Societât Filologjche Furlane 'e à olût tornâ a organizâ lis Frais de Viarte, al fo sielzût Sequals par screâ la gnove serie. 'E fo une grande fieste, che, dopo dal taramot, il paîs al si presentâ come che duc' varès olût viodi duc' i paîs furlans ch'a fòrin taramotâz. Sequals al jere lì, denant dai vôi di dute la int rivade di ogni dontri, simbul di une gnove realtât, di un gnûf Friûl cu la fuarze di Primo, il gjgant che duc' pense ancjemò a lui cun tun afiet dulinziôs. Che se Sequals, in plui di tante fuarze e di tante braure mostrade su la ricostru-

zion, al à ancje l'umanitât di Primo, alore al è il prin paîs dal Friûl!

Il fat al è che un paîs cussì sempliz e cussì biel, cui arcûz des sôs cjasis, cu la netisie des sôs stradis, cu la glesie alte su la cueline, che si rîvile par une scjalinade avonde lungje, nol è fazzil cjatâlu. E al ven di pensâ che, alore, no son impuartanz i granc' monumenz, lis sioretâz e lis grandezis. Pal vivi di une comunitât, plui impuartant di dut 'e je la vertût viodude a Sequals: che lì, in tune sagre gnove, i furlans e' àn podût viodi come tun spieli chê ch'e à di jéssi stade la plui vere grandezze dai lôrs vons.

L. C.

No si à di ufîndisi se chêi altris nus scuindin la veretât dal moment che une vøre dispès 'o sin nô i prins a scuindise di bessôi.

FRANÇOIS DE LA ROCHEFOUCAULD

La sgnape furbe

In chêi agn, sot Nadâl, sul tart, a' vignivin a viodi se tu vevis bisugne di sgnape fin su la puarte di cjase, a Biliris.

A' vignivin pai boscs, incidins come spîis, forsi di Sotcret di Samardencje, di Sante Marie Madalene, di Plazzàriis, di Pers... A' batevin adasi te puarte e al lave a viarzi il nono che ur domandave: «Ce uèliso?».

«Vêso bisugne di alc?».

«Si pò ancje vê bisugne di alc».

«Un moment», a' disevin. Si dislontanavin tal scûr e subito dopo a' tornavin cun tun sacaprôt di dulà ch'a gjavavin fûr une butilie di «furbe».

Il nono al distaponave, al nasave, al zercjave. «Trop?», al domandave.

Tant.

'E costave miez tant di ce ch'e costave là di Candolin a Tarcint. Di chel instès 'e costave simpri masse par Lùzio, par Tilio e soredut par Toni Ucel che, tal ultin, a' savevin che un lambic nol pratindeve faturis di sorte par pissâ fûr ce che si j domandave: al pratindeve juste qualchi fassut di lens secs, qualchi sclop di fajâr, qualchi ore cidine tal scûr de gnot e tal ultin gâtul su pe mont, vie dai trois; e la trape, che si cjatàvile par un blanc e un neri.

E alore in chel an che Ènio dal Ucel disôre, che lu clamavin Ninine, al diventà finanzot dopo di vê fatîs lis sôs bielis scuelis a Caserte, e al rivà a cjase in munture cu lis sôs bielis mustrinis zalis sul golâr de gjache-te, alore a Toni j vignî sù di furnîsi de sgnape che j coventave senze scugnî meti lis mans te sachete.

Si fasè imprestâ di scuindon di Ninine la sô munture cu lis sôs flamis zalis e il so cjapiel uso alpin ma cu la napine zale, e al metè sù chê munture la sere ch'al scrupulâ ch'al sarès rivât l'omp de «furbe».

Chest al rive, ae sô ore. Al bat adasi cu lis àinis te puarte tant ch'al usave, e j viarz Tilio, ch'al jere d'accordo cun Toni sul cemût compuartâsi par vê la sgnape a bon presi.

«Comandâiso alc?», j domande sot vôs a Tilio il biât.

«Sì», j rispuint Tilio.

Il biât al va a cjoli il sacaprôt che lu veve lassât tun cjanton dal curtîl in tal scûr e al torne subite dopo cul sacaprôt plen di butîliis.

Si sbasse par pojâlu ben planc sul solâr, e une volte che si è drezzât sù, al viôt un finanzot lì devant, dret, impins, ch'al è Toni, ma che lui nol sa ch'al è Toni.

Al reste, par omp, che nancje che j fòs comparît il demoni, cui braz a pendolon.

«Finalmentri ti ài», j dîs Toni.

E chel: «O pal amôr di Diu... pal amôr di Diu,

siôr», j dîs, «che nol stedi a fâmi dal mâl!».

«Dami ca il sac», j comande Toni.

«... che nol stedi a fâmi dal mâl ch'o soi plen di fruz e senze lavôr...».

«Dami ca il sac!».

L'omp j dà il sac alzanlu pes brazzadòriis. «Che nol stedi a fâmi dal mâl, che Diu lu ricompensarà».

Toni lu cjale a lunc e po' j dîs: «'O varès di menâti in casarme, ma stant che tu sês plen di fruz e senze lavôr...». J fasè tirà fûr dal sac lis butiliis de «furbe» e j 'es fasè meti in rie sul sojâr, «... stant che tu sês plen di fruz e senze lavôr, par cheste volte vada, ma guai se tu vessis di tornâ a fâmi une tâl».

«Che Diu lu binidîssi, siôr maressiâl».

«Va».

«Tantis gràziis, siôr maressiâl».

«Va!».

Il bon omp nol partive.

«Ti ài dit che tu lédis».

«Siôr marassiâl, podarèssio vê il gno sac indaûr? Che se i miêi borghesans e i miêi di cjase mi viodèssin a tornâ senze sac...».

Toni j dè il sac indaûr e j metè dentri une di chês butiliis par ch'al podès bêvint un flât ogni tant biel che si rimpinave su pai gâtui dal Cjampeon.

Si à savût agn dopo ce tant ben che chel puar cristian al veve dite di chel finanzot che lu veve becât a

Biliris: che nò nome no lu veve menât in casarme par-
vie di chê sgnape «furbe» ch'al lave a piazzâ cuintri lez,
ma che parfin j veve tornât il sacaprôt e regalade adiri-
ture une butilie di «furbe».

M.

Il maressial inglêš Montgomery, tal 1942, co al comandave la
VIII Armade britaniche in Egjt, biel ch'al lave a ispezionâ i siêi sol-
dâz tal desert, s'imbatè tun camion che lu guidave un soldât nût
dal dut cun, sul cjâf, un cjapiel a cilindro. Al pensà di riclamâ duc'
ae dissipline e al mandà fûr un avîs ch'al diseve: «Te XII Armade
al è proibît di puartâ il cjapiel a cilindro».

DIARI

*Tù, frut, che no tu làssis
di scrivi tantis rîis di puisîis
su duc' i sfuéis ch'a jèssin tal paîs;
tù, frut, che tantis oris tu lis stràssis
cun tun penâl in man
par fâ ce che tu fasis; sta lontan
dal crodi a di chel crìtic che di te
al conte che tu sês un alc e ce,
un bulo, un gnûf ch'al merte preseât,
publicizât: insumis un rivât!*

*Nò, frut, làssital dî:
tù no tu sês rivât. Tu âs di partî.*

M.

SAN SCJÈFIN

Al torne San Scjèfin, e a Biliris 'e torne la sagre, une des tre sagris dal païs, dopo di chê di San Jàcun e di chê de Madone dal Rosari, de quarte domenie di utùbar.

'Ne volte la sagre di chest protomàrtar, di chest prin màrtar de glesie, 'e jere la miôr, séi parvie ch'e colave tun timp che duc' i omps a' jerin tornâz in païs des Gjar-màniis là ch'a vevin fate la lôr stagjon, séi pal fat che in chê di nol pluvive par sòlit, come che invezi al pluvi-ve la quarte di utùbar, che i magnaloz a' vignivin ca a sagre cun dôs ombrenis, par menânus pal boro, séi pal fat che il plevan che in chê volte al puntificave al veve non Scjèfin ancje lui, come il sant, e j tignive une vøre.

Par une setemane interie prime ch'e capitàs, lis cjampanis a' scampanotavin par oris cun Bepo Pierès, o Costantin di Fabro o il Moro de Vicjârie a manovrà i banducêi de mezane e de pizzule che nissun come lôr. E lis feminis a smondeâ la glesie in duc' i sucriz: la Ul-vine, la Franzescje di Busan, la Màbile de Tuche; e Nando Menon e Meni 'Aroni a navigâ 'tôr confenons e standarz.

Il di de sagre a buinore il barbe Varisto al faseve puartâ fûr tal curtîl des balis de sô ostarie un caratel

di vin pai clienz che si saressin presentâz subit Messe o tal dopomisdi, e i colazzârs a' rivavin a postâ lis lôr bancjs ce ca ce là cui lôrs golosez.

Po' la messe 'es dîs. Stracolme la glesie. Quatri predîs a vignî fûr de sacristie cun pre Scjêfin in glorie: pre Oton di Faelis, pre Pieri di Sidilis, pre Satanasso di Samardencje, don Lino Molaro, e nô, zagos, in sîs, cu lis tònîis di bugade, rossis o neris, e lis cuetis cåndidis, ben sopressadis, cu lis lôr galis a pendolon incoladis; e po' il coro, la benedizion dal altâr, e un bonodôr di incens di beâsi. E la predicje di un predicjadôr d'inclaudâ la atenzion di duc', cun qualchi peraule latine a riuart de elezion di San Scjêfin a diàcun, a diacono: «Et elegerum Stephanum, virum plenum fide et Spiritu Sancto».

Podopo a gustâ, un siôr gustâ. Podopo a gjêspui e in prucission 'tôr dal zuc di Pierès, cu la bande a sunâ e cu la statue dal sant su la puartantine, biel, alt, zovin, cul plat in man cui tre clàs che lu vevin copât: «I macarons!», al diseve Cornelio.

Tanc' agn a' son passâz d'in chê volte e chês sagris alì a' son in pôs uê a visâses: Fonte di Fabro, Pieri Cragnulin, Arnest, Rinaldo di Vincjarêt, Celso, Dezi-mo, Bepo di Mezelan; e la Gjeme, la Manda, la Taré-sie di Basili. Chês di dopo 'o sin cetanc' di plui a visâ-ses, ma chestis... sào jo! No son stadis ni spietadis ni gjoldudis come chês là. E chês di cumò...

Ben. Il timp al à cjaminât e al cjamine. No 'si pò

tornâ indaûr e si scuèn stâ cul timp: lotarie, pèsce, polente, cueste, lujànie e bruade, parcè nò!

Ma te clime di bontât, di fraternitât, di concuàrdie che si viveve une volte; e di devozion, ancje se la glesie no je plui chê.

M.

La nature no oblèe l'omp a pecjâ, ma j à dât la inclinazion al pecjâ; la nature no dà ni la sapienze ni la virtût, ma la disposizion ae sapienze e ae virtût. Si devente savis, no si nàs savis; e deventâ bogn 'e je un'art ch'e dipent de libare volontât nestre, adula ch'al sta il mèrit o il demèrit de nestre vite.

LUCIO ANNEO SENECA

CUMIÂT

Eco, e cumò ch'o sin rivâz dapît
une domande a vualtris ch'o vês let:
ce ch'o vin scrit lu vîno scrit pulît?
il troi là ch'o sin lâz îsal il dret?
Opûr vîno falât? Vîno scrocât?
Se sî, cjapàise cu la Sozietât!

M.

TABLE

THE END

Preambolo	7
Zenar	8
Un'ora di quiete (Ugo Claret)	12
Un'ora (Miguel)	13
Beati Quir di Fardone	16
Cognome (Piero di Spedal)	17
Diar (M.)	18
Silvino (P.S.)	18
Piccoli	21
Fevile	23
Fruzzosa (Marina)	24
La calandra (M.F.)	26
La cinghia di nido (Tribuna)	27
Gradale (Bepi di Diana)	28
Diar (M.)	30
La agne Sante (N.D.D.)	30
Chazzuola (Tribuna)	31
Beluati (Franco Parisi)	32
Scali (Vico Breton)	33
Marz	35
Vitale (Giovanni)	36
Tresciana (Alain Breton)	37
Schiarde di marz (Mario Argente)	37
La tur e la bulghe (Tribuna)	38

THE END

TABELE

Preàmbul.	pag.	7
Zenâr.	»	9
Unviâr di cueline (Lelo Cjanton). . .	»	13
Unviâr (Meni Ucel).	»	15
Beât Duri di Pordenon	»	16
Cognons (Paule di Scjecât).	»	17
Diari (M.)	»	18
Biliroz (P.S.).	»	19
Picolit.	»	21
Fevrâr.	»	23
Fruzzons (Uarbite).	»	28
La calandre (M.)	»	29
La onestât di mê none (Trilussa). . .	»	37
Graduâz (Bepi di Diana).	»	38
Diari (M.)	»	39
La agne Sunte (B.D.D)	»	40
Cjazzadôrs (Trilussa).	»	41
Il litrat (Luzio Perès).	»	42
Scais (Vico Bressan)	»	43
Marz	»	45
Viarte (Glovaz).	»	50
Tresemanis (Alan Brusini)	»	51
Sclaride di marz (Mario Argante). . .	»	53
La lune e la lùsigne (Trilussa). . . .	»	54

Checo il legionari (Alviero Negro). . .	pag.	55
I cècs di Dolfo (Sergjo Visentin) . . .	»	57
La vuere stelâr des colis (L.C.). . .	»	59
L'ernie di Visentin (L.C.) . . .	»	60
Avrîl . . .	»	63
Dubis (P.S.). . .	»	68
Scampanotade di Pasche (G.). . .	»	69
Becs (U.). . .	»	71
Viarte dal mâr (L.C.). . .	»	73
Avrîl (Dino Virgili). . .	»	74
Il bocâl (M.). . .	»	75
Maj . . .	»	77
La partide (M.). . .	»	83
Chernobyl (Giannino Angeli). . .	»	85
Machinis (P.S.). . .	»	86
Consolons (M.). . .	»	87
La moto di Aldo (Aldo Gallas). . .	»	88
In Baviere (Eddy Bortolussi). . .	»	89
La moscje e il ragn (Trilussa). . .	»	92
Jugn . . .	»	93
Puritât (Enea De Colle). . .	»	98
Diari (M.). . .	»	99
Il todesc (Luciano Verona). . .	»	100
Istât de planure (L.C.). . .	»	103
Liturgje gnove (A.G.). . .	»	104
«Ta l'oselada» (Renato Appi). . .	»	105
Luj . . .	»	107

Andreis (L.C.).	pag. 111
Misure (Redento Belbo).	» 114
La malada (Ovidio Colussi).	» 115
«Made in Friûl» (E.B.).	» 117
In famèe (Trilussa).	» 118
Scais (V.B.).	» 119
Un vin... da Messa Santa (R.A.).	» 121
Avost.	» 125
Cormóns (L.C.).	» 129
Deliri (Lorenzo Moschi).	» 131
Beade Benvignude Bojane	» 132
Curiositât cjastiade (Lucia Scoziero).	» 133
Il sturnel (M.).	» 135
Patâtis (E.D.C.).	» 136
Ajûz (U.).	» 137
Fruzzons (M.).	» 139
Ingjans (Marco Valerio Marziale).	» 140
«Ma ancje orent!» (E.B.).	» 143
Setembar.	» 145
Grau (L.C.).	» 147
Il gardilin (M.).	» 151
Bilirote (P.S.).	» 152
Avarizje (M.).	» 153
Tresemanis (A.B.).	» 154
Síarade de mont (L.C.).	» 155
Mangjâ e bevi (A.G.).	» 156
Merlot	» 157

Toponomastiche storiche (A.N.) . . .	pag. 158
Utubar	» 161
Manià (L.C.)	» 165
La barzalete (M.)	» 167
Otobri (O.C.)	» 169
Verduz di Ramandul.	» 170
Il bon ladron (M.)	» 171
Novembar	» 175
San Canzian (L.C.)	» 179
Sante Catarine di Alessandrie.	» 181
Une ridarole fûr di puest (Renzo Valente)	» 183
Dicembar.	» 187
Sequals (L.C.)	» 191
La sgnape furbe (M.)	» 193
Diari (M.)	» 197
San Scjèfin (M.)	» 198
Cumiât (M.)	» 201

Finî di stampâ
te tipografie Doretti a Udin
in contrade di Prampâr
sot Sante Catarine dal 1986

RENATO APPI
Diretôr responsàbil

*

MENI UCEL
redatôr


*

Cumitât di redazion

RENATO APPI
LELO CJANTON
MANLIO MICHELUTTI

gubana **DORBOLO'**

S. PIETRO AL NATISONE (UD) ITALY



**IL DOLCE TIPICO
DELLE VALLI
DEL NATISONE**

DITTA E. DORBOLO' E F.LLI S.N.C.
S. PIETRO AL NATISONE (UD) ITALY
TEL. 727052

Laura

Confezioni - Filati - Maglierie

VIA MANZONI 5 - TEL. (0432) 731229
33043 CIVIDALE DEL FRIULI

Marino Palma

Abbigliamento - Confezioni

PIAZZA A. PICCO - TEL. (0432) 731275
33043 CIVIDALE DEL FRIULI

VIDUSSI

TESSUTI

CONFEZIONI

ARREDAMENTI

SPORT - PELLICCERIA

VIDUSSI

33043 CIVIDALE DEL FRIULI - PIAZZA A. PICCO
TELEFONO (0432) 730051 - 730052

1886-1986

CENT'ANNI A CIVIDALE, IN FRIULI.



Banca Popolare
di Cividale



Angelo Linda

UN GRANDE NEGOZIO
DI ABBIGLIAMENTO E MERCERIE

33100 UDINE Via Paolo Canciani, 51

Birreria Moretti Stazione

RISTORANTE - TAVOLA CALDA - PIZZERIA


UDINE - Viale Europa Unità, 69
(di fronte alla Stazione F.S.)
Telefono (0432) 293897



ORTOPEDIA
g.porzio

NEGOZI DI VENDITA ESCLUSIVAMENTE IN:

- | | | |
|--------------|----------------------|-------------------------|
| ● UDINE | Via Aquileia, 58 A | Tel. 0432/295660-207214 |
| ● UDINE | Via Aquileia, 51 | Tel. 0432/501460 |
| ● TRIESTE | Via Gatteri, 12 | Tel. 040/772180 |
| ● PORDENONE | Via Mazzini, 16 | Tel. 0434/255970 |
| ● CERVIGNANO | Via S. Francesco, 31 | Tel. 0431/30805 |



IL NOSTRO E IL TUO LAVORO INSIEME PER TRADIZIONE

Le nostre Casse sono nate cento anni fa,
per iniziativa di agricoltori e artigiani.
Come te. Per questo conoscono i tuoi
problemi più di chiunque altro.
Compensano al meglio i tuoi depositi,
e sono a tua disposizione con qualificata
consulenza, con finanziamenti e mutui
agevolati per la costruzione,
l'ammodernamento di laboratori,
e l'acquisto di attrezzature e di macchine.
Alla Cassa Rurale ed Artigiana,
sei tra amici.



**CASSE RURALI
ED ARTIGIANE**

del Friuli Venezia Giulia

la Banca di casa tua



BANCA del FRIULI

società per azioni

*80 sportelli nelle province
di*

BELLUNO, GORIZIA, PADOVA, PORDENONE
TREVISO, TRIESTE, UDINE, VENEZIA

SEDE SOCIALE E DIREZIONE GENERALE
UDINE - Via Vittorio Veneto, 20

Dovete fare acquisti in cartoleria?

**Noi abbiamo quasi tutto
e spesso anche molte cose in più**

**(per esempio una sala di esposizione
con almeno 3.000 idee regalo)**

CARTOLERIA BENEDETTI

33100 UDINE - Via Mercatovecchio, 13

Tel. (0432) 501534

Non lasciate svanire i vostri sogni.

» Prestito personale »

E' uno dei tanti servizi offerti dalla



SEDE E DIREZIONE GENERALE GEMONA DEL FRIULI Tel. 982363

FILIALI:

Gemona, tel. 982363
Piovega, tel. 981251
Artegna, tel. 987017
Buia, tel. 960141
Majano, tel. 959021

Osoppo, tel. 989246
Ragogna, tel. 955191
Trasaghis, tel. 984024
Venzona, tel. 985020
Rive d'Arcano (Prossima apertura)

Tempestività anche senza sportelli locali



VITRUM

S.r.l.

*Porcellane - Mobili in stile
Posaterie - Argenterie
Articoli casalinghi
Cristallerie*

Piazza Matteotti, 10 - UDINE - Telefono (0432) 501358



Largo dei Pecile, 7
tel. 21102

**LIBRI
DI OGNI TIPO
E CATEGORIA**

**TESTI
SCOLASTICI
E
UNIVERSITARI**

ASCENSORI MONTACARICHI MONTAVIVANDE



DE ROSA

**Via Sabbadini 66
UDINE**

ARTICOLI CINE - FOTO

Pignat

UDINE - Via Rauscedo, 1 - Via San Francesco, 24
Tel. (0432) 501729

alfa pubblicità

di ROMANO DE ZORZI
AMMINISTRAZIONE E PUBBLICITA'
VIA DEL CARBONE N. 1 - TELEFONO (0432) 501324
33100 UDINE

**IL MEGLIO
AI GIUSTI PREZZI**

EFFICIENTEMENTE



CRUP

Cassa di Risparmio
di Udine e Pordenone

Al tuo servizio dove vivi e lavori

Furlans

a Vignesie us spiete


I'ALBERGO BONVECCHIATI

SEDE DEL FOGOLÂR

San Marco 4488 - Telefono (041)5285017
Telex 410560 BONVEC I

di GIOVANNI DEANA paron furlan

Pubblicità a cura di: **AFA PUBBLICITA'**
Via del Carbone 1 - 33100 UDINE - Tel. (0432) 501324



Furlans

2 - Vigevano alla spola

L'ALBERGO BONVECCHIATI

SEDE DEL FOCCLAR

Via Dante 4435 - Tel. 0321/105111-2017

Telex 410583 BONVEC I

St. GIOVANNI DEANA paron fudg

2 - Pubblicata a cura di "ASA PUBBLICITA"

Via del Carcano 1 - 20121 MILANO - Tel. 02/48111111

